

KAILASHAHAR BAPTIST CHRISTIAN ASSOCIATION

Darchawi, Kumarghat, Unakoti Tripura



Sunday School

Primary kum 2na

**Published by KBCA,
Hqrs. Darchawi, Kumarghat
Unakoti Tripura**

THUHMAHRUAI

Ahmasak chemin ei Pathian hnianga inpâkna nih chawimawina kên hlân. Asanchu roiinpui vaika nih inmak fêkan ei Koihrana sin ani thaw pêk leiin, maleiachun kum 2008 ațang chun mâni țong ngeiin Sunday School Lekhabu nei thiam dingin ei om ta. Lalpa chu atharin inpâkna, chawimawina nih roiinpuina chu ei inhlân nawk. Mâni țong ngitin Pathian thu hawi thiam dingin nih zir thiamin ei om tâk leia, Koihran, Zirtirpu, Zirlâi tamkan malsawmna ei dong kê ring. Kum 2013 homin mâni țong ngitin lekhabu ei nei thiam nawk leia Pathian hnianga nih ma dinga mi tâimâkhei hnianga lawmthu ei hril. Vawn hin Association angka nih literature committee angka ma dinga Lalpa a mi tâimâkhei, Rev. Ngurzidinga, Upa. Lalbiaka, Upa. Țhuamliaana, Upa. Lalhmingthanga, Pu. Darhmuna, Upa. Shangtinkhuma, Upa. V.L Lawma, Pu. Thlamuana, nih manuscript ațanga computer a ni loi type pêkhei, P/P Jacob nih Mr.Venghima anmanihei hnianga hin ei Lalpa Isua Krista rihming inthiangin ei Lawmna thu ei hril. Sunday School hmangin Koihrana malsawmna tamka ei dong tir kê ring , Lalpan a Koihranhei hnianga nansa vaikan a malsawmna indong siala, chun mihei ta dinga malsawmna bul chang rise ti hi ki țongințaina achang. Lalpa chu roiinpuiin om rise.

Nin rongbawlpui

Rev.Rantuasanga Darlong
I/c. Lit.& S.School Comt.
K.B.C.A Darchawi
Unakoti, Tripura.

Zirlâi 1

LALPA lamlian siampu

Siar ding: Luka 3:11-18

Thuvong: “LALPA lamlian chu siam ta roi, a lampui chu thlûn roi.” (Luka 3:4)

Thuhmahruai: India rama tumo a lian chem aw? President mo Prime Minister? Anmani angka hmun danga an inzin ding chun an kalna ding lampuihei an loi siam tha thin. Vawn hin Lalpa hong ding leia lampui loi siampu a rihming Baptistu Johan a chanchin zir ei ti.

1. **A piang dân nih a nu nih Pa:** A pa rihming chu Zakariah, puithiam achang. A nu rihming chu Elizabeth. Anmani ruai hi nâi nei ta loi ding angka inngai an changa. Lalpa'n a nu tọngintaina zâra nâipa a pêka. A nu pum sunga a om lâi renga Rithla Inthiang sip (Luka 1:5-15). A rihming chu Johan a an saka. Johan achu rongbawl a taan hma daiin ram thlalera a om thin. A puansilhei chu makungkang hmul puan, a nêkfâk chu khâi, khuaisu (Matt 3:4), sa nih zu reng reng a thaw thin no. Aman ân hawina a tang renga thil thaloi laka inserhrang achang.

Eini hom ei chiklâi a tang Pathian rongbawl dinga ei inning hrang ve ding. Inhâi thei thil hrim hrim hi ei ser ding achang.

2. **Johan a rongbawk dân:** Johan a rongbawl dân hi khovêla rongbawltuhei rêk ân ang no. Khovêl dân chun milian hong ding hin an kalna ding lampui an siam. Johan achun mîhei lungril tianga lampui siam a tum achang. A rongbawl na tuipuaia reng hin “Sim roi” a tia. Mîhei hnianga, nundân dikloi monga Pathian thûa a awidân angka om dingin a hril. Mihriamna lungril ngaituana sualhei inhnila mâni thianginhlim tir dingin a fuia. Chun nîntinin mî dang chung a râ tha inhmû a tangpui nih roirêlhei hom tanbîk neiloia roirêl ding. Thoktuhei hom mâni hlaw tianga lawm tawk dingin ân cha. Chungkachun Johan achu pân lak vaikan Lalpa zâra a hril ding a hril thin. Adikloi thaw dik dingin a hril ngama, lal hom a zak naw a. Lal Herod a hom a dikloina a hril suak pêk leia a tawpa lal thûpêkin a lu an tan hial achang.

Eini lâi homa ei Lalpa Pathian ringsanin thûdik tanngam ei tûl.

3. **Johan a hnianga mîhei baptisma an chang:** Johan an thlalera thû a hril thin lâiin mîheiin zawlnei an ti thin. A thûhril an ngaia, a dîk an tia, an insual zia an inhawia, a hnianga baptisma an kâi thin. Ma baptisma chu simna baptisma achang. Asanchu a thûhril thupui hrim ha simna thû achang.

Atun eini lâia te sual insim ding a nei inhawi ei om âi mo? Mî kareng nu pum a tang sualna nei ei changa ei sim ding hi a om pak.

“Sim” tina chu mongkhal, thaw ta loi tina achang.

Zawna:

1. Baptistu Johan a nu nih pa rihming tumo?
2. Baptistu Johan an imo a sila a ifêng thin, nih imo a fâk thin?
3. Baptistu Johan a thuhрил thupui imo?
4. “Sim” ti hi itina mo?
5. Adikpu pai thlang ro:
 - a. Johan a pa rihming chu _____ (Zakariah/Samuel/Job).

b. Johan achu tu ònginṭai leia a piang mo? _____ (A pa/A nu/ Vântlâng).

Zirlâi 2

Isua a hong kal

Siar ding: Johan 1:29-42.

Thuvong: “Enta u! Pathian berate khovêl sual pêlpu so!” (Johan 1:29)

Thuhmahruai: Baptistu Johan an Isua hong ding thûa, a thû loi hril thupui ei la hawi mo? SIMNA thû ahang ha aw. Mîhei lungril sual insim tira, mîhei lungril a loi isât ei ti ha. Ma angka chun nundân ṭhaloi insim dingin baptisma an chang.

- 1. Lal hong kal chu:** Zawlnei Johan achu a kalna paia simna thû a hril ṭhina. Voika chu Jordan tuipei kawla thû a hrila a om lâiin, Isua chu ama tianga ihongin a hei hmû a. Johan an, “Enta u! Pathian berate khovêl sual pêlpu so!” a tia. Ama (Isua) hong ding thû hrim hi Johan a loi ihril, Lal hong ding a ti aha a loi chang. Asanchu, Lal Isua zâra Pathianin khovêl mîhei ama ring apai chu an insualna ngaidama an om ding ahang. Ama chu sandampu a ipoma mâni sualna laka insanna chu Isua sandampua ringna chu a loi chang. Tun eini hom Lal Isua ki sandampu tia ipomin sandama om theina ei nei, ei hei vânei êm!
- 2. Lal Isua chu sininsiana a nei:** Khovêl sipai hoitu reng hom an michang sininsiana hun siam an chang ṭhin. Lal Isua hom Johan a hnianga baptisma ahang lâiin tui aṭanga a hong suak vele, a chung a vaṭhu angka Rithla Inthiang a hong fûlna thapa rivan aṭangin rawl a hong ṭongsuaka, “Mahi ki nâipa dittak, ki lawm êm êm achu ahang,” tiin. Ma thû suak aṭangin a Chiang ta êm êm. Machu Rithla Inthiang sininsiana chu ahang (Luka 3:21-22).
- 3. Lal Isua an zui nghâl:** Johan an a loi hril angka ipai a hong chang rît hnung chun, ama (Isua) ahang tiin a zirtir 2ka chun an zui ta nghâla. Eini hom a thû ei inhrila, ei ring nghâl mai ding ahang naw mo? A zuihei a zirtir 2ka lâia Andria chun daivalkan a ompui thei mai naw a, a unaipa Simon a a hril ve a. Isua hnianga a hong pui ve a. Ama entonin eini hom ei Pathian thû zir ihawi dingin ei unai/mî dang hong ṭhui ve thei ei ti mo?
Isua chun Simon achu a hei hmû ve le rihming thar, “Kifa” tiin a loi hei koi, Kifa chu greek ṭong, Petros, machu eini chun “Lung” tina ahang. Eimani lâia Isua loi hmû ta ei la rihming tharin ani koi ding mo aw!

Zawna:

1. Isua baptisma ahang lâia a chung a vaṭhu angka hong fu a ha imo? Imo ân entir?
2. Isua hnianga a unaipa hong ṭhupu ha tumo a rihming?
3. Simon a rihming thar ha imo? I tina mo?
4. Isua baptisma ahang dân sîr ro.
5. Enta u! Pathian berate khovêl sual pêlpu so! Tumo a tipu?
6. A awl insip ro
 - a. Enta u! _____ so!

Zirlâi 3

Sandamna Lampui

Siar ding: Johan 3:1-16.

Thuvong: “Lalpa Isua ring inla sandam chang nê ti, nang nih ni insûnghei rêk.” (Tirkoihei Sinthaw 16:31)

Thuhmahruai: Atun loi zuk thê ta eila ei rithla iamo om dingin nin ring? Vanram mo hremhmun? Vanrama ei rithla om chu ei awi pak. Ringloituhei homin an awi. Vawn hin vanram ei kal theina dingin Pathian thûin imo ani hril loi zir rei.

- 1. Judah hoitu mî khatka:** Zânka chu Isua hnianga Judah lâia hoitu khatka hi a va a. A rihming chu Nikodemas. Ama hi Jidah farisai achang. Zân khera a chamhei hmûloi kêra Isua hnianga hang a loi chang. Mî danghei hom Isua hnianga thû fâ dingin an hong thin a loi chang. Nikodemas hom thû hawifia ding ineia hang achang. Eini hom Pathian hnianga ei infia ve thin ding achang.
- 2. Piangtharna thû:** Judah farisai hoitupa Nikodemas buaina chu piangthar thû hi achang. Zâna Isua hnianga a hanga, Isuan a loi hmû chun, “Tupai an piangthar naw chun Pathian lalnaram hmû naw ni,” a ti pêka. Ama hi Judah sakhua hoitu achang ve a. A lung a zînga, inkan mo, nu puma lût nawk ding mo, tiin ân mak a tia. Isuan, nu puma lûta piang ding tina chang mak. Tui nih rithla a piangthar ding thû a hrila. Mî tupai an vârna, an felna lei ringotin vanram chang no ni a, mî sual tak hman changsia a piangthar chun vanram lût an ti,” a tia.
- 3. Sandamna Lampui:** Sandamna chang dingin nih vanram lût dingin imo ei thaw ding? “Pathianin khovêl a hmangai êm êm a, a nâipa neisûn a pê. Tupai a ring apai chatuan nunna nei an ti,” Johan 3:16 tiin ani hrila. Chun piangthar ding chun Pathian nâipa Isua Krista khovêl sandam dingin a hong ti ring hi, eini angka mî sual homin ei lampui chu achang.

Tuhman Pathian laka thleibîk ei om no. “Tupai a ring apai” ti achang. Naipang, ulianhei ding homin a huap rît. Pathian thû siar tam, hawi tam achang no. Nikodemas, Judah hnam lâia farisai, Pathian thû khovêl thû hawia piangthar ding tina achang naw leia Isua hnianga indon dingin a hang. Isua sandampu ti ring hi, Piangtharna. Asanchu Isuan, “Keima hi lampui, keima aţang naw chun tuhman pa hnianga an hong thei no,” a ti (Johan 14:6).

Zawna:

1. Zâna Isua hnianga hong ha tumo?
2. Iding hrima hong mo achang?
3. A hongna san ha a dong mo?
4. Pathian ram lût theina imo?
5. Mîin inkan mo Sandamna chang thei an ti?

Zirlâi 4

Tidamtu Isua

Siar ding: Johan 5:1-9.

Thuvong: “Keima hi LALPA nangni ân dampu chu kê chang.” (Exodus 15:26)

Thuhmahruai: Hospital mo damloi omna a ei kal chun mî damloi zâl ei hmû ðhin. Damloiheiin an ibeisei chem chu damna achang. Eini lâia hin hospitala mo damloi omna a ei kal pak ta mo? Damdaw In, Hospitala damloi leia la zâlloiheï kapai chu an vânei achang. Maleiachun I dampu ei loi chang chun, damna nê pepu/ anên dampu chu Lalpa achang. A hnianga lawmthû ei hril ding achang. Vawn hin ma angka damloi Isuan ân dam ti thû zir ei ti.

- 1. Bethesda dîl a:** Dîl an iti ðhin hi nin hawi ta ðhin mo? Dîl an iti chu tuider luangna om tak tak loa tui tamka omna. Jerusalem khua bula rihming inthang tak dîl lian khatka a oma. A rihming chu Bethesda dîl achang. Tiana hin ma dîl achun vantirkoiheï an inlâr ðhina, an hong chun ma dîl tui chu a fawn (A phûl bur bur) ðhin. Ma a fawn lâi taka damloi inchawm hmasak apai chu an dam ðhin an ti. Maleiachun, dîl kawla damloi tamkan an loi nghâk ðhina, an lâia mî khatka hi ma tuifawn nghâkin a om ve a. Kum 38 zet ân chawm hman naw leia a dam no. A khongai thlâk ti roi mu! Asanchu ana hi inzeng thoi theïloi, mî ikhêl ðhin, a ti.
- 2. Isuan inzeng ân dam:** Nîka chu Isua ma Jerusalem khua a Kût hmang dingin a zu ve a. Ma dîl kawla achun a va lêng a. Damloi omhei chu a va hmû a. Ma inzengpa hom chu a va hmû a. A hnianga, “Dam ni awi bei?” a tia. Ani chun, “Pu keite ane ruan ding boi, ki thoi vit theï nghâl no a, mîin annên chawm khal ðhina,” a tia. Ma inzengpa chun Isua achang ti hom a hawi no. Isuan dam a awi zia a lungril a hawia, “Thoi ro, ni puantha chawi inla, ni pheïin kal ro,” a ti pêka. A hang thoia a kal theï ta nghâla, a hei lawm ding êm ve aw, ti roi mo! Isuan, “Thoi ro,” a ti kanin a thoia, a ringhlel no. Eini hom damloïin ei om hin Isua iringin ei dam theï. Ma inzengpa chu ân dampu Isua achang ti Judah mîheiin an hrila, eini hom ei natna anên dam theï. Ei dam hin Isua achang enên dampu ti loi hril ve rei, lawmthû loi hril ðhin rei.

Zawna:

1. Bethesda dîl i kawla mo a om?
2. Bethesda dîl kawla inzengpa ha kum izaka a loi nghâk tâk ha?
3. Isuan i thû mo a indon a ha?
4. Bethesda dîl hong vêlpu ha tumo?
5. Damloi sawt aha inkan mo a dam?

Zirlâi 5

Isua mit vârna pepu

Siar ding: Johan 9:1-9, 35-38.

Thuvong: “In ngaina kuar nih hmûtheina mit, Ân hnîn LALPA isiam an chang.” (Thufing 20:12)

Thuhmahruai: Ei mit ei hipa ihman ei hmû thei no. Ei khar om naw sia ihman hawi no ning, ti roi. Ei hong izir tâk ahan Isuan damloi dang dang ân dam thûhei ei hong zira, vawn chun Isuan thilmak tidamna thû zir nawk ei ti.

- 1. Mitchaw, kutdaw:** Jerusalem khua a hin a piangtîr aţanga mitchaw khatka a oma. Amana a awi awina kal vena ding hmû theilo, mî honghei hnianga an rihâi hawiin a kut a loi daw ðhin. Mî tamkan an thei tawk, an inei an pêk ðhina. Eini hom ma angka kutdaw ţangpui ðulhei ipe ve, ţangpui ve ding ahang ti roi mu? Ama hi a piangtîr aţanga mitchaw ahang.
- 2. Isua a hong:** Isuan a dam lâiin hmun hrang hranga chanchin ðha hrlin a kal ðhina. Kalna paia a zirtirheiin an zui ðhina. Ma mitchawpa chu a hong hmû a, a khongai ta êm êm a. Isuan a thûhrlina achun khovêl inêngtirpu kê chang,” a ti ðhina. Maleiachun, ma pa chu a hmû chun êng a hmû theina dingin a mît invâr pêk a awi a, a mîchang a hawina dingin.
- 3. Isuan a mit ân vâръ pêk:** Isuan ma khovêla a om sêngin, khovêl inêngtirpu kê chang a ti angkan, ma mitchaw mit achun rineng chîr a bel pêka. “Siloam dîla va su ro,” tiin a hrla. Siloam chu “Tir” tina. Dîl achun a va sûka, a mit a hong vâръ a, a hmû thei ta a (Lawm a ti mu). Êng pepu kê chang a ti angka takin Isua lak aţangin a hmû ta.
- 4. Isua chibai a bûk:** Mitchawpa, a mit a hong vâръ a, tumo mit vârna pepu a la hawi no. Mî tamkan a mit a vâръ ta ti an hawi chun an iam no a, Jerusalem kawla inţhung ðhin aha ahang naw bei an tia. Mitchawpa chun a hawi suaka, mit vârna pepu chu Isua tiin. A hnianga a va a chibai a va bûka. Pathian nâi ahang ti a hawia, ân pâk ta ahang.
Eini te malsawmna dang ei dong hin Pathian aţanga ei idong ahang tiin lawmthû ei hrl ðhin mo? Malsawmna ei idong chung a Pathian hnianga lawmthû ei hrl nai nai ding ahang ti loi hawi rei.

Zawna:

1. Mitchawpa chanhin tawikan sîr ro.
2. Mitchawpa nun a hin imo ei zir ding om?
3. Siloam hi itina mo?

Zirlâi 6

Isua kuar vârna pepu

Siar ding: Mark 7:31-37.

Thuvong: “Nin mit chun a hmûa, nin kuar chun a hawia, an vannei.” (Matt 13:16)

Thuhmahruai: Khovêla en inhoi tak tak hmû ding a om angka dênin inngai ding tha tak tak rihâi a om. A hawitheina ding chun kuar a tûl achang. Mangkadênin rihâi insua thei dingin tong thei a tûl sa a. Ei izir tâk ahan Isuan mitchaw mit ân vâp pêk ti thû ei hong zir ta ha. Vawn chun Isuan kuarsêt, tongtheilo a indam thû zir nawk ei ti.

- Galili dîl kawla:** Isua hi a om mai ngâi no a. Hmun hrang hranga a kala, chanchin tha a hril thin ti thû ei hong hril ta ha. Vawn Galili dîl kawla thil omzia chanchin zir nawk ei ti. Voika chu Isua hi Sidon kua nih Dekapolis kua kaltlangin Galili dîl kawla a hong tlunga. Ma dîl kawla ram vêt hi rihming inthang tak achang. Asanchu dîl nga an tama, ma nga hman chun mî tamka an dampuipha achang. A hmun ram vêt hom hi hmun inhlawk tak, theikunghei hom an tha an ti.
- Kuarsêt tongtheilo thû:** Ma dîl kawla an hong tlung chun Isua chun an hmupui awi pakin mîhei chu a hnianga an hong. An lâia mitchawhei, kuarsêt, natna dang dang neihei hom an om. Chun Isua la hmû veloi ihmû ve awi hom an chang thei. An lâia kuarsêt tong hom tongtheilo an hong iṭhui Isuan an dama ding ti beisei nih ring pumin. Dam hi chu mitinin ei awi pak a loi chang. Poisa sêng hom ṭiloia inenkol nai nai ei chang mihriam hi. Dam nih hrisêl hi ihman rêk ân tekhin thei no ti roi mo!
- Isuan kuarsêt tongtheilo ân dam:** Isuan ma kuarsêt tongtheiloipa chu a hei koia, tawika a hei kalpuia, a kuar chu a kutin a khîk pêka, a lei a thema, rivan tiang enin “Effatha” a tia. Machu inhong ro, tina achang. Mangkachun a kuar a hong vâp a, a hong tong thei ta a. Isuan mangkata a hong tongthei nih a kuar vâp tâk achu tuhman hrilloi dingin a cha a. Achanghomin a daival thei tâk naw a, uâr fêkan a hril ta zawka. A zirtirhei hom han, keini chu kin ihmû nih kin ihawi hrilloiin kin om thei naw an ti thin angka han. Ngaitua ta u, kuarsêt kuar hong vâp pêk, tongtheilo hong tongthei chu a hei lawm ding êm ve ti roi. Eini lâi homa thil danglam ei hmû, ei dong hin ei lawmna hrilloiin ei om thei thin no.
Mangkachun Isua chu a kalna paia mîhei iṭul a thaw pêk thin lein mipui hom an daival thei thin no. Eini hom Lalpa a ei ihmû, ei idong om dingin loi tongintai rei. A hnianga ipai a om, vârna a om, lawmna a om, ei dong ve chun hril ding nei ei ti

Zawna:

1. Ihmuna mo Isuan kuarsêt tongtheilo ân dam ha?
2. Isuan inkan mo kuarsêt nih tongtheilo ha ân dam?
3. Imo a omzia, “Effatha”.

Zirlâi 7

Phârhei an inthiang ta

Siar ding: Luka 17:11-19.

Thuvong: “Kê awi, inthiang ta ro.” (Matt 8:3)

Thuhmahruai: Tunlâi khovêla natna chi hrang hrang hi a tama. Malaria, AIDS natna hi ðiom chema an hril. Asanchu a damdawi dik tak an la hmû naw leia chang a ti. Maleiachun, AIDS natna aţanga fiminkhur tûlna hi khovêl hmun tina an hril. Tian achun phâr natna hi an loi ði chem ðin. Phâr invoihei chu khua sunga an inomtir ðin naw an ti chu. Atun rochun a damdawi an hmû suak tâk leiin an ði ta no.

- 1. Phârheiin Isua an pan:** Isua Jerusalem pana a kal lâiin phâr sawmkan lama an tonga. Isua an hmû vele, arualin an awnga, “Isu ni khongai ro” an tia. Tiana phâr invoihei lama mî an tongin phâr kin chang an tia, an awng ðin an ti. Asanchu mîin an intir, an hrî an ði. Maleiachun, tuhman rêka inhmû inhnâiloiin khua putiang an isia ðin achang.
- 2. Isuan phârhei ân dam:** Isuan phârhei awng rihâi chu a hawia, a hei ena, a khongai ta êm êm a. Dam siala a hei awi achang. Ma hun lâi hin Judah dânin phâr loi dam hman chang siala, an puithiamhei hnianga endik kher inngai achang an ti. Maleiachun, Isuan phârhei chu dam siala a hei awi kanin an dam chu achang phota. Kal unla puithiam vân hmû roi tiin a tir a. Chun puithiam hnianga an va a. An hei kal lâia idam an chang. Hei kalloiin, ringhlelin la om siala an dam no hom achang thei. Isua ðongbâi, “Van hmû roi” ðongbâi awia an kal leiin an dam puipha ta achang.
Eini lâi homa ei natnahei, a sia a ðha ei nu ei pa ei hrila ei inhmû hi Pathian thû a loi chang.
- 3. Lawmthû hrilna:** Isuan an awng rihâi hawia dam siala a hei awia, an dama. Thiamchangna dam famkim an chang thû judah dân zawma puithiamhei van hmû a awi a. An damna famkim lei achun an lawm. An lawm pak ei ring. Lawmthû, ân dampu hnianga chun mî khatka chaiin a va hril. A chamhei mî dang 9ka chu anmani lawm lawmin an lawma, a pepu, ân dampu hom an hawi ta no. Lawmthû hril hi ringtuhei sin khatka achang. Ringtu, Isua neihei chun lawmna an nei, lawmthû hril ding hom an nei ðin. Vawn hin achange lawmthû hril diing nei ei om mo?

Zawna:

1. Tunlâi khovêl natna ðiom chem hi imo?
2. Phârheiin Isua hnianga imo an hril?
3. Isuan phâr izaka mo ân dam?
4. Isuan phârhei ha itianga kal ding mo a ti pêk?
5. Adikpu thlang ro,
 - a. Isuan phâr a indamhei ha-9/10/7.

Zirlâi 8

Pathian dinga thilpêk

Siar ding: Mark 12:41-44.

Thuvong: “Pê roi pêkin om nin ti.” (Luka 6:38)

Thuhmahruai: Ei hong izirtâk ahan phârhei Isuan izaka mo a indam ei hawi ha, 10ka an chang ha. Izakan mo Isua hnianga lawmthû an hong hril ha? I i thilpêk loi dong hom eila lawmthû ei hril hi a tha. Thilpêk dong hnek homin a pepu chang hi a la tha zual. Pathian nunchang achang. Wawn chun Pathian ram dinga thilpêk thû zir ding ei chang, thaivaikan loi ngai roi.

- 1. Biak Ina thawhlawm thilpêk:** Biak Ina inkhawmna a Pathian rihmingin thil ei pe thin. Ma thilpêk aţangin Pathian ram dinga sinhei an hlaw ei pe. Tiana Jerusalem Biak Ina inkhawmna achun an lawr thin naw a, thlâka an ithlâk thin achang. Kot bula a bûr an daw a, machun an inhlân thin. Isua hom ma Biak Ina ân khawm ve thin.
- 2. Thawhlawm pehei thû:** Thawhlawm pehei hin ei pêk zât ân ang ngâi no. Thenka chu a nei tama, a pêk hom a tam. A nei hroihei chun an ipêk hom a hroi thin. A nei tampu ipe hroi hom te om thou an ti. Biak Ina inkhawmna a, Isua ân khawm ve a, mîhei thawhlawm pêk a loi en maia, nuhmei khatka hi a hong inkhawm ve achang. A Ina a nei sîn lepton inhnika a hong chawi vita thawhlawm bura chun ân thla ta vit achang.
- 3. Isuan thilpêk a ngaihlu:** Inkhawm lâia thilpêk inthlâk lâi a loi ihmû chu Isuan a zirtirhei a hrila. Mî tamkan thawhlawm an hong pêka, a pe tam fê fê hom an oma. Achange, ma nuhmei thlâk zâka inthlâ tuhman an boi a tia. Isuan ei thilpêk tam hi a ngaituapu achang no a, ei pêk phat dân lungril hi a ngaitua a loi chang zawk.
- 4. Thilpêk dân dik:** Thilpêk thil Lalpa'n a en naw a, ei pêk lâia ei lungril hi Lalpa I en a loi chang zawk. Maleiachun, apostol Paul a homin, “Pathianin hlim vaika nih lawm vaika pehei a hmangai,” a ti. Maleiachun, ei pêk reng rengin inpâm puma ipe a tha no. Naipang homin thil pêk dân dik chu inpâmloia pe hi Lalpa awi dân achang. Nuhmei chun a neisûn, a pêk thei sîn lawm êm êm puma a pêk dân a hmû a, Lal Isuan a lawm achang. Lalpa'n a nâipa neisûn lawm vaikan khovêl eimani dingin a pe. Lalpa hawia lawm vaika thil pe hi pêk dân dik achang.

Zawna:

1. Jerusalem tempula thawhlawm bawm ha iamo an sia thin?
2. Nuhmeite hin thawhlawm bawm ahin izaka mo a thlâk?
3. Pathianin I angka lungril neia thil pe hin mo a hmangai?

Zirlâi 9

A dik-zong dik

Siar ding: Johan 6:22-27.

Thuvong: “Pathian lalnaram nih a felna chu zong hmasak zawk roi. Kachun, mahei kapai chu pêk belsapiin om nin ti.” (Matt 6:33)

Thuhmahruai: Isuan mîpui sâng ringaka ân fâk lâiin, inain mo ân fâk? Baite 5ka nih ngate 2ka achang ha. Ma baite nih ngate ha tu ta mo? Naipangte khatka ta. Isuan mîpui fâkding zong roi a tia, an zong lâiin, naipangte chaiin fâkding a dawn ti an hawia. Naipangte chun phal vaikan a loi pe. Phal vaika pe hin sinthawtheina a nei ðhin ti ei hmû.

- 1. Mipuiin Isua an zong:** Isua chu thilmak a thaw ðhin nih thaw theina a nei leiin amana omna hun hom a nei ðhin no. Voika chu mipui nêkfâk a pêk zoiin daivalkan an omna hmun tuia rilong chu a lâka, tuirâl daia a loi kal pêka. Mangkata dîl râla an hmu chun mak an tia, mipuiheiin an indon a, “Rabbi, mahin itika nê hong mo?” an tia (Rabbi chu zirtirtu tina). Mipuihei chu a hnianga an va nawka. Isua chun an lungril a hawia, a lawm no. Asanchu a thilmak thaw hmû awi lei an chang leia. An tàm lâiin atlongin mak takan chikate thil aţangin khopna an hmû leia an ingaih lut ti a hawia. Isuan an lâia thûin a hrila, “Tak takan, nangni kê ti hi, sininsiana nin hmû leia anni zong achang no. Changrochu bai nin dutawk nin fâk leia achang zawk. Fâk ding se thei umin sin sawl naw roi. Chatuan nunna aria ommi ding, fâk ding umin sin sawl zawk roi. Manmasi Nâipa nangni pêk ding zawk achu. Asanchu Pa, Pathian chun ama chu sîl a loi hem ta,” a tia. Pathianin ei taksa dinga poimaw fâkding chai a ngai poimaw naw a, ei rithla sandamna hi a ngaitua zawkpu achang tiin a hrila.
- 2. A ðul zong dik:** Zawnei Isaiah homin, nêkfâk dik chang nghâlloi iding rai mo khopna dik chang nghâlloina a nin sêng ðhin, tiin thû a loi hril ðhin ha. Asanchu khovêl roiinpuina nih ðulna a tam nghâla. Achang homin machun ei dit zawng hi a kip chuangin lung a hnip chuang no. Maleiachun, Isuan, “A ram nih a felna zong hmasak ðhin roi,” tiin a hril. Ei zong ding dik tak hi chu Isua hi achang. Ama ahin chatuana tàmloina, tui hrâlloina a om. Tunlâi hun homa hin Lalpa a zong loiin khovêla lianna, inchongna, In ðha, fâk ðha zongin ei oma. Pathian hnêk homin ma angka chang tumin ei zong. Changrochu, khovêl thila loi hmû nih loi nei hom chang ta eila, Isua Krista Lala nih Pathiana ei nei naw chun, ma khovêl thilhei chu manganna nênl thlung dinghei chai an chang. Lal Isua ei nei chun ei iðul dang kapai ni pe bel sa a tia, lunghnipna chatuan nunna ei nei achang.

Zawna:

1. “Rabbi” hi itina mo?
2. “Rabbi” ti hin Isua hi an koi ðhin bei?
3. Isuan I thil mo zong hmasak ding a ti?
4. Chatuan lunghnipna imo mihriam dingin ani ihril?

Zirlâi 10

Isua ngaidamna

Siar ding: Johan 8:1-11.

Thuvong: “Isuan a hnianga, ‘Kei homin thiamloi nang kên chang bîk no. Kal inla atun ațangin insual ta naw ro,’ a tia.” (Johan 8:11)

Thuhmahruai: Tâng In (Jail/pațok) an iti hi tumo a hawi? Tuhei mo ma tâng Ina om țin? Mî ținloi, misual hremna hmun chu tâng In achang. Ma tâng Ina an ikhumhei chu an insual dâna zirin a sawt a sei a om țin. Chun ma hmun achun an loi țin that thei chun ngaidam chang an om thou țin.

- 1. Uire lâia an ihman thû:** Nîka chu Isuan tempula mî a loi inzirtir lâiin Judah hoituhei (Lekhaziatu nih Farisai) a hnianga nupang khatka uire lâi mî ihman an hong puia. Judah dân chun ma angka mîsual hi lunga sep that ding achang, nangte imo ni ti ve an hong tia. Mahin Judah mîheiin an itum tak chu Isua ținongsual sia, thiamloi achangna ding an zong ve a loi chang. Asanchu Isua inzirtirna thupuia an ihmû chu simna thû, hmangaina thû, ngaidamna thû achang. Simna omloi chun sakhuana mai chu ihman achangloi zia a hril ținina. Anmanihei rêka an inrem theiloina hi, Lal Isua chun Lalpa thû ring sanin a hrla, Judah sakhua hoituhei chun an Judah dân ring san an changa, maleiachun an inrem thei no.
- 2. Mî kapai an insual rît:** Isua loi ihawi sai, Judah dânin uirehei chu lunga sep that ding ti thû. Ma thû hi Farisai nih Lekhaziatu chun Isua hnianga an hong pui. Isuan an hnianga, “Nin lâia sual neiloi apaiin ama hi lungin sep hmasak rise,” a tia. Mataka mipui nih Judah hoitu lâia mîhei chun tuhmanin mâni sualna neiloi riaia an inhawi no leia, a khât khâtin an kala, an boi rîta. Tunhom eini hom mîsual ei changa, suala piang ei changa, maleiachun tumo chang dikloina thû ei hmusit ding achang no.
- 3. Uire nu ngaidam achang:** Sep that dân zawm dinga honghei kapai chu Isua țingbâi ațangin an inhmusuaka. A sep ngam boiin an kalkhala. Nupang chu aman a om ta a. Isuan, “Tûhmanin thiamloi nang an inchang no, kei homin thiamloi nang kên chang bîk no,” tiin thû a cha a, “Kal inla atun ațangin insual ta naw ro,” a tia, a ngaidam ta a.
Eini hom mîsual rît ei changa. Thî thlâk rît ei chang. Isuan, “Tupai ki hnianga honghei chu hnot naw ning,” a ti. Maleiachun, Farisai nih Lekhaziatu hom Isua hmâa thiamchang an inti ngam no. Isua chun, “LALPA’N, ‘Nin sualhei chu senduklâr angka chang homsia, Vûr angka vân a tia, Senlâr angka chang homsia, Ûl angka chang an ti,’ a ti,” ti thû a loi hril angka (Isaiah 1:18).

Zawna:

1. Uire nu ha Mosi a dân angka I angka hrem ding mo a ti?
2. Isuan tumo a sual a ngaidam a ha?
3. A awl insip ro:
 - a. Isuan kei homin_____ bîk no.

Zirlâi 11

Inngaithlawmna

Siar ding: Johan 13:1-5, 12-17.

Thuvong: “Inngaitlawmhei chu an vânei, rinêng hi an la lua ding leiin.” (Matt 5:5)

Thuhmahruai: Atun lâi ringtuheiin ei Kût poimaw bîk chu Krismas nih Good Friday achang. Judah mîheiin an ihmang lian chem ve chu Kalhlen Kût achang. Pathianin Aigupta ațanga a hruaisuak ding zâna Israel nâiheî a kalhlen ding, hawimaina a an ihmang (Exodus 12:13). Isua zirtirhei homin ța vaikan an hmang țin. Ma hun hin cholnokloi bai an sîama, sa an raw hmina, an hmê a an fâ țin.

1. **Isuan a zirtirhei phei ân su:** Sikul, Sunday School a hoitu/zirtirtu en neia. An thû ei awi țin. Hoitu thû awiloi chu naipang țialoi an chang tina. Isua zirtirhei hom an pu chu Rabbi an tia (Rabbi chu zirtirtu tina) a thû an awi țin.

Isua chu Kalhlen Kût ruai an nei zoiin, saituidawna tui a sunga, puan a lâka, a zirtirhei khat khatkan a koia an phei a sûk pêka a hrûfâi pêk. Khovêla a dam sawt tâkloi ding a hawia. A hril țin angkan inngaithlawm entirna dinga a ithaw, inngaithlawm sin inentirna achang.

2. **Isua zirtir angkan:** Mihriam awidân chu a lianpu, mîheî chung a om awina hi achang. Maleitak hi achang mihriam lâia buaina a suakna țin chu. Maleiachun, Isuan ân zirtir a tum chu mî dang dinga rongbawlpu ichang achang. Isuan mihriamtin hi inangka rîtin ane en. Isuan inngaithlawm takan rongbawla ama angka dênin a zirtirhei an chang a awi. Maleiachun, a zirtirhei phei a isûk pêk. Eini hom ama ringpu ei chang chun ei rongbawl ve na ahin a chik a lian om loia rong ei bawl hi Lalpa'n a awi.

Koihran nih khotlâng homa buaina a omna țin chu chik-lian awina hi achang. Isua ti dân angka takin rongbawl eila ihom buaina om naw ni. Lalpa rithla hruaina a ei om ding leiin.

Zawna:

1. Isua nih a zirtirhei han I Kût ruai mo an inei ha?
2. Isuan a zirtirhei iangka om dingin mo a dit?
3. Isuan zirtirhei phei a sûk pêk han imo a inentir?

Zirlâi 12

Nupang huaisen

Siar ding: Johan 2:1-21.

Thuvong: “Anni chu ân kal tira, an kalsuak ta a. Nupang chun tukvera hrui senduk a khâia” (Joshua 2:21)

Thuhmahruai: Ei lâia nu neiloi ei om bei? Nu ei nei pak. Nu ațanga piang rît nâi ei chang. Ipa ținkan mî ngainêp bî ei nei țin. Ma angka hi thil țialoi achang. Vawn hin nu huaisen fêka chanchin zir ei ti.

1. **Enthlatu an hong thû:** Tiana Aigupta ațanga Pathianin Israel mipui a hong hruaisuak dân ei hong zir ta ha. Kanaan ram an hong hnâia, LALPA thupêk chun an loading rama loi omhei inhnot suak rîta, ithat rît ding a iti. An hei hnâi tak taka, khua lian loi om chu Jeriko khua a loi chang. Machu Jordan tuipei kawla om achang. Ma khua chu an lua, an lâk hmasak a tûl pêk. Jeriko khua chu roiinpu tak, kula an inhuan rît achang. Tuhman râl lût theiloi dinga an isiam. Hang lût rak thei achang no. A sũa omhei dinghmun hawifia a tûl achang. Joshua an hoitupa chun mî 2ka a tir a. Mikhual angkan Rahab Ina an hang tlunga. Jeriko khua mîheiin an hawi rûka anmani that dingin sipai an hanga.

2. **Rahab in a loi thup:** Rahab homin an Ina mikhualhei, Jeriko sipaiheiin an hang zong ding hi a hawia. A khualhei hi Aigupta ațanga Pathianin a hong ițhuihei an chang ti a hawi nghâla. Sipaihei chung a innghatloiin, a mikhualhei chung a innghatna lianka, beiseina a nei a. Anmanihei chu sipaihei an hang hmâin an daliaza lâia a loi thupa. Sipaihei an hanga Rahab chu an indona. Ani chun, “An hong a, an kal nawk thai, an kalna ki hawi no,” a loi ti pêka. Mangkachun sipaihei an kala. Sipaiheiin hawi siala, Rahab chu hman an tia, tuar a ti, ti roi.

3. **Enthlatuhei chu an kîr:** Sipaiheiin an kalkhal homin Rahab ding chun lunghnipna a om pêk vak no. So tiang ân fêhei Joshua nih a mîheiin an hong kîr hi an loi nghâk ve mai nghâla.

Rahab In omna hi jeriko khua kul kot tlanga om achang. Zâna arukin hruiin Rahab chun kul putiang a In ațangin a țuma. An kal ding lâiin enthlatuhei hnianga a ihnî chu, Nakana Jeriko nin hnê a nin lâk tikin kei nih ki insunghei tal chu nin lâia om thei dingin ni zua roi a tia. A hnîna chu an poma. A In sininsiana dingin patsen an tlunga, an khâia an kal ta a.

Enthlatuhei hi Rahab In khera an va tlung hi an vannei. Rahab homin anmani hi Pathian ruat an chang ti a loi ihawi hi Pathian thû achang. Nupang hniang homa Lalpa remruatna a om thei. Tuhman Pathianin a hmusit no, ane hmang thei pak.

Zawna:

1. Joshua an ikhua a mo enthlatu a hei tir ha?
2. Enthlatuhei loi intlung nupang rihming ha hril ro?

Zirlâi 13

Jeriko khopui lâk thû

Siar ding: Joshua 6.

Thuvong: “Awng ta roi, LALPA chun khopui hi nangni a pe ta.” (Joshua 6:16)

Thuhmahruai: Great wall of China an iti a hawi tâk nin om mo? Ma hi tiana an lalpa in an khopui chu tû râl homin an lûta, an hnê theiloina dinga a inhun an ti. Asanchu tiana an indoi dân chu thala sâi, feia insun, chema intuk aching țhin. Ma wall hi ân sang dân chu 15-30ft, ân sa dân chu 12-20ft, a sei dân chu 2415Km an tia. Vawn hin Jeriko kul an iti ma angka dëna wall-bêr sunga om khopui roiinpu Israelheiin an siata, an lût dân zir ei ti.

Pathian Thupêk: Aigupta ațanga Israel hnam intâng ținuisuakpu tumo ei hawi mo? Mosi a ei iti ha mu. Mosi a thlengin Pathianin Joshua a ruata. Joshua hoiin Kanaan ram lût dinga thupêk ti puithling ding aching ta. Kanaan ram ilût dingin Lalpa'n an hmâa khopui lian Jeriko khopui mîhei inhmâk tir rît dingin a hril. Jeriko khopui rûn dingin-kul sunga an om achanga, intakfê aching. Lalpa'n an thaw aw ding a hril chu-Jeriko khopui kul kawla nin om tikin nîntin voika mipui rengkan daivalkan nî rukka nin vêlkual țin ding. Chun nî sarina nî chun voi sarika vêlkual nin tia. Ma nî chun puithiamheiin hmâ hruai an ti, mipuiin zui an ti. Atawpna voi sarina țin achun arualin tongtorawt inring fêkan tum nin tia. Nin rengkan arualin awng unla, tiin Joshua a hrila. Ma angka chun Joshua'n mipuihei a hrila. Jeriko kua sipaihei tuam roiinpui fêka inring saia iom mai mai, Israelhei chu tuam ihman nei chuang loi-Lalpa Pathian țin chaia an om.

Jeriko Kul a chim ta: Pathianin a hril angkan Israel mipuihei chun nî rukka an vêl zoia. Nî sarina nî chun voi sarika an vêl. Voi sarina achun Joshua an hma hruaitu nih puithiamhei nih mipui chun arualin tongtorawt inring fêkan an hong tuma. An awng inruala, an tuam neisûn an hang ilek chun Jeriko khopui kul chu a chim ta hum hum achang. A sũa sipai loi om țin ținpuheiin ma nî sarika sũa putianga Israel mipui omkhawmhei ithaw ihman an hawi no, ân mak. Lalpa'n a icha poimaw tak chu, kul nin lâk dinga nin lûtin ihman thiltha poimaw tuhmanin nin lâk loi ding tia a icha. Chunkachun Jeriko kul chu ichim ta hum chu, Israel mipui awng pumin an lût hum huma. A sũa a khopuia sipai, mipui an that ta chiama. Khopui chu an lût.

Rahab insung chu zua an chang: Jeriko khopui, Israel mipuihei an hong lût tâk chun khopui kul chim ringot homa mipui tamka an țin a. Ala damhei chu an thata. Changrochu enthlatuhei an va lâia mikhual angka mai changloia nunna loi zua, loi thuppuhei Rahab nih a insunghei chu ihman an hen no. Atul hun taka mî san hi Pathian țin achang. Rahab, nupang hman changsia Israel hnam kalzêl enthlatuhei sanna hmangin Lalpa'n a san ve. Lalpa Pathian hawimaika ipaithawpuhei chu Lalpa'n a san țin ti hi ei inhnilloi ding.

Zawna:

1. Mosi a zoia Israel hruaitu dinga Lalpa iruat ha tumo a rihming?
2. Nî ruk sungin Israelheiin voi izaka mo Jeriko kul an vêlsuak ha?
3. Jeriko kul a chima Israelheiin an rûn han tuhei insung mo an izua ha?
4. Jeriko khopui inkan mo a chim ha?

Zirlâi 14

Israel nâihei an hmualinphoi

Siar ding: Joshua 7:1-26.

Thuvong: "LALPA chun mifelhei kalna lampui chu a hawia, Mi hmangloihei lampui rochu boiral a ti." (Sâm 1: 6)

Thuhmahruai: Tikmochanga bazaar mo ei kala, mita ei ihmu ei dita, ei inzuk țin. Mî ținlooi chun a idit a hmûin, a neipu hawilooin a la pêk țin. Lâkloi aw a ila hrim hrim hi a țin ni. Pathian awiloai achang.

Israel nâihei an raw: Ei izir tâk a han Jeriko khopui Israelheiin an la ei tia. Atun an kal nawkna ding an hmâa kuate khatka Ai kua an lâk itul a om nawk ta a. An hoitupa Joshua'n enthlatu a

tir nawka. Enthlatuheiin Joshua hnianga, khuate an change, anmani rûn dingin mî tam ngâi naw ni, an tia. Mî sang inthumka an va a. An va ngam naw a, an hong kîr achang. An lâia mî 36 pai an loi that pêk zawk. Israel mipuihei chun an ði in an inngaitua ta a, imo a san tiin.

Ai khu a an ngamlaina san: Inzuum fêka mî 3000 kan an va ngamlaina san a inngaitua thlânga. Joshua an hoitupa chun a thuam inthuum lâihei a ek a, a ðapa a, puan ðhaloihei silin Pathian hmâa bokkhu pin a ðongintâia. Hruaitu danghei hom an ðongintâi vê. “Imo kin thawsual Lalpa nê hawitir ro,” tiin an ðapa. Pathianin an ðap rihâi hawiin a thungna chu-nin lâia Pathian huat zawng thawa, thawloi ding, lâkloi ding thil ila a idawn nin om, tiin thû an hawia. Joshua chun an lâia ma thil zong dingin ân ninga.

Akan an ân puangsuak: An hong zong tak tak chu Akan a, Judah mî diktak a loi change. Jeriko khopui an rûn lain Pathianin ihman nin lâkloi ding a tia. Ma thupêk hawi maikan insûm zoiloiin Babulon puan ða chi, tangka nih rangkachak Akan achun a loi ilâk a loi chang. Mî khatka insual leiin Israel hnam pum an tuar puipha. An hawi Chiang hnung chun Akan achu Akor ruama an ðuia an sep that. Akan an ân hlawkpui ding a sona thûpuina a loi chang pêk zawk. Ai khu a chikate ila mai thei hmuna mî 36 lâi nunna an chên pha a, an tuar pha achang. Pathian thupêk hawimaika thawloi hi a tawpa siatna nih vanduin a achang. Maleiachun Pathian awidân hi izonga, ei zawm ding achang.

Zawna:

1. Israel hnamheiin tuhei mo an ingamloihei ha?
2. Ai khu aheiin Israel mîhei izaka mo an that?
3. Israelheiin Ai khu a an va ngamlaina san imo chang ha?
4. Israelheiin Ai khu a chikate ilei mo an ingamloi?

Zirlâi 15

Thu tiam mai mai naw ro

Siar ding: Joshua 9:1-27.

Thuvong: “Nin ðong tiam chu thaw tir unla, nin ðong tiam chu thaw zoi ngêt ngar ta u!”
(Jeremiah 44:25)

Thuhmahruai: Ei nu ei pa heiin thaw dinga anni iti hi thaw kê ti ei ti pêk ðhin. Mî tamkan aw ei tia, ei thaw ðhin no. Ei intiam chun ei thaw le ding achang. Pathianin, thaw dinga nin intiam chu, thawloi chu a phal no.

Israel hnamhei hnam dangin an ði: Israel mîhei Aigupta a ðangin Pathianin a ðhuisuak. An hnamin Pathian thû an awia a hril angkan an om ari chu Pathianin a vêng. A ram tiam pana an kal lâi homin, a thû angka an kal ari chu an him ðhin. Fâk ding boina, tui boina hmun homa tui a pê ðhin. An hmâa doi ding hom ân hnê pêk ðhin. Maleiachun hnam dangin an ði êm êm.

Israel mîhei lemin an om: Hnam dangin Israel hnam an ði, an huphur. An omna ram kaw l vela hnam dang hroika an oma, Gibeon hnam an ti. An nâihei chun Israelhei itiin, an lâia an om vê theina dingin hinkahin an va lem. Thuam hlui tak an inthuum, fâkding hlui an chawia an hnianga an va a, an hoitupa Joshua hnianga, ram hla tak a ðanga hong kin change, kin thuam, kin

fâkding chawihei a se zoi ta, an tia. Khongaitakan ni zua hrâm unla tiin. Gibeon mîhei chu om vê an phal ta a. Mahin Joshua mîheiiin an loi inthial chu Lalpa thusuak chun tuhman hnam dang om phalloi dinga a ihril achang.

An lân hawisuak: Inrema omhmun thei dingin an inthuralpui zoi nî inthumka hnungin an hawisuaka. Gibeon mîhei ram hla ațanga mî an inti homin an kawla mîhei an chang. Khêl an ihril. Atun lâi hom kêl hril homin fâk thei diing a om chun poi tina neilo ei tam.

Gibeon mîhei hremna: Gibeon mîhei ilem achang ti Israel mîhei chu an hawi hnung chun an ning a thika. Changrochu thû inrema om dinga an loi iti tâk, Pathian awiloi achang homin. An thutiam pai loin an lâia inhlawfa angka sinthawpu ichanga intak fêka homa siahlaw angka maia an lâia om dingin an inhril tâng thiam nawka. Chunkachun Gibeon mîhei homin poi tiloiin an om dîn ta a. Pathian ikhap, Lalparawn loia Gibeon mîhei rêka inremna an isiam ha thaloi achang. Asanchu Pathian thû loia sinthaw hrim hrim hi ți om achang. Ipai ei thaw ding hi Lalpa hrila thaw ei tum ding achang.

Zawna:

1. Israel hnam hong lemhei ha tuhei mo?
2. A hong lemhei ha I angka hremna mo an chang?
3. Israel hnam hi inkata mîin an ți?
4. Israelhei ha ihsam mo a hong lemhei?

Zirlâi 16

Israelhei an tidudana

Siar ding: Roirelpu 6:1-10.

Thuvong: “Nin LALPA nin Pathian chu hmangai nin tia, a thû, a dân thûruat, a roirêlnahei nih a thûpêkhei chu nîntin nin zawm thîn ding achang.” (Deut 11:1)

Thuhmahruai: Mosi a zoia a thlengpu Pathian iruat aha nin la hawi mo? Joshua achang ha. Joshua hoiin Lalpa ipêk ram Kanaan ram chu an va lua a. Joshua hi Lalpa ți mî, indoi thiam, a hmâa tuhman a ngîr ngam an om no. Hnunga Joshua chu a thî vê a.

Israelheiiin an Pathian an inhnîl: Joshua damsung chun Israelheiiin an Pathian rongbawlina chu an nei dik. Joshua a hong thî hnung chun, Aigupta ațanga a hong thui pu Pathian chu an inhnîl. Pathian siamchop rong bawla, an awi awiin an om ta achang.

Midian mîhei kuta Israelhei: Lalpa Pathian an inhnîl, an awi awia an om hnung chun, Lalpa chun tiana a hong thui pu Pathian a om ti an hawi theina dingin an chung a hremna intluung a thain a hawia. Midian hnam hmangin hremna a siam pêka. Midianhei chun an awi awiin an loi-inhma rahei an lâk pêka. An ram, an loihei achun an ramvâhei infânain an hmanga, an inbuai a. Pathian chu hmangaina ti hman eila a awiloi awa ei om chun ei hawi khîr theina dingin harsatna anê siam pêk thîn achang. Atun hom eini hniang homa harsatna, buaina a hong tlung thei. Pathian hma tiang songa ei inhawi khîr vê vat Lalpa'n a awi achang.

Pathiana an kîra an koi nawk: Midianheiin an hong tiduda vak hnung chun, a tîra an Pathian an hong hawi khîra, an koi nawk achang. Thlamuanga, lunghnipa an om lain an Pathian an inhnîla. An rithla a hong vai nawk chain an Pathian an hawi nawk. Maleiachun, ei tak ei innep lâi homin ei Pathian loi inhnîl riái naw rei ti hi ei thû zir achang.

Zawnei hmanga Pathian rawl: Mangan lunginriang tonga an Pathian an izong nawk thû a, zawnei hmangin thû a hrila, “Aigupta aţangin Lalpa’n nangni a hong hruai suaka, ram tha khuaizu nih rihnu tui luangna rama nangni a hong intlung ta. Maleiachun, ama chai rong nin bawl ding,” tiin. Atun hin nin Pathian nin inhnîla pathian dang rong nin bawla, mahi nin thaw dik no, tia a ihril achang. Hmangai Pathian chu, a thû awihei ding chun a hmangaina ei chung a om nghâl kumkhua thîn.

Zawna:

1. Joshua thî hnungin Israelhei lungril inkan a om ha?
2. Tuheiin mo Israel mîhei an tiduda thîn ha?
3. Ilea mo Israelheiin Pathian an koi nawk?
4. Adikpu thlang ro: Israelhei hnuamhen thîn hnam chu-Midian/Gibeon/Aigupta.

Zirlâi 17

Pathian thû awi Gideon a

Siar ding: Roirelpu 6:11-32.

Thuvong: “Inpâk tlâk LALPA chu koi ki tia, Kachun ki hmêlmahei lak aţangin sanin om kê ti.” (2Samuel 22:4)

Thuhmahruai: Ei hong izir taka thû ahan Midianheiin Israelhei an tiduda thama, an tuar ei hong ti ha. Ilea mo achang nin la hawi mo? An Pathian an inhnîl leia, pathian dang rong an bawl lei ei ti ha mu. An lâia mî khatka a oma, ani chun atîra an Pathian rihming changloi chu pathian rihming inlam awiloi hrim achang. Ma chanchin chu zir ei ti.

Vantirkoi inlârna dong: Israelhei chu Midianheiin an inbuai fê leia an lungril ân dart a fê a. Nêkfâk zong takhman a tak pêka. Malâi chun Joash a nâipa Gideon a hi Pathian ring mî, zânka chu a hnianga Lalpa vantirkoiinlârna a donga. Gideon achu vantirkoiin, “Nang mî hrât huaisen, LALPA chu ni hnianga a om,” a tia. A hratna nih a huaisenna hmanga Midian tududana lak aţanga a sanpu ding Lalpa’n a hong ruat ding a hrillawkna achanga.

Gideon an Pathian ân donna: Gideon a hnianga vantirkoiin thû a hong intlung chu mak a tia. Lalpa hnianga ʘonginţainain ân don a, “Aw ki LALPA, inkan mo Israelhei chu hang san thei ki ti?” a tia. Lalpa hmâa mî thling ei om no. A khongaina zâr zoia ani ihmang thîn ei chang.

Gideon achun Lalpa rawl achang tak takmo aw, a tia, inthawina a siama, kêlte nih cholnokloi bai a siama, lungpui chung a sia a. Vantirkoi chu a hong a hrol a zuk teka, a kângral rîta. Gideon achun ma hmung rihming chu “Yahweh Shalom” tiin a koi.

Eini hom thaw dinga Lalpa’n ani ti ei inhawi hin, Lalpa hnianga ʘonginţaia ei lân fia lak thîn ding ti anen zirtir achang.

Zâna Lalpa’n Gideon a hnianga thaw ding a hril: Zân achun Gideon a hnianga Lalpa’n thû a hong hrila. A pa Joash an Pathian mâichâm a siam, “Baal pathian mâichâm nih Asher pathian

rimil chu pair o,” tiin thû a donga. Kachun Gideon achun Lalpa hril angka Baal mâichâm nih Asher rimil chu ân fâi rît ta a, a zân a zân chun.

Joash an a nâipa Gideon a a ãan: Zîng khua a hong vâ a, mîheiin an pathian In nih rimil isia rît chu an hmûa, an lawm no. A thawpu an zongsuaka, Gideon a ahang ti an hawia. An ti dân chun an pathian In nih rimil ipai insiahei an hawi chun ithat ding an iti ahang. Gideon a pa Joash achun, tuhmanin ma ân sepû chung a ihman thawloi ding. Ân sehei chu ma pathianin an chung a roi la rêl rise, a tia. Joash achun a nâipa a ãan tâna., Gideon a hom lawm a ti, ti roi.

Gideon an Pathian thû awia, rimilhei chu a siat ahang ti achiang. Eini hom Lalpa Pathian thû ahang, ei ihawi ithaw hi ei panlak ding ahang.

Zawna:

1. Grep sawrna khura bû chîla ha tumo chang?
2. Gideon an ithil mo Pathian hmûa a inhlân aha?
3. Gideon an imo Lalpa thûpêka a isiat aha?
4. Yahweh Shalom ti hi tu isak mo?
5. Gideon a hi iangka mihriam mo?

Zirlâi 18

Gideon an a mîhei a san

Siar ding: Roirelpu 7:1-25.

Thuvong: “LALPA chun ei dingin thil roiinpuitak a thaw ta a, ei lawm ta.” (Sâm 126:3)

Thuhmahruai: Ei hong izir tâk ahan Gideon an Pathian thû awiin a pa pathian biakna Baal nih Asher mâichâm ân sia ei ti ha. Vawn chun ma hneka sin ding Lalpa'n Gideon a a pê ti thû zir ei ti.

Gideon an râl inbei dingin mî a ruat: Sipai sinthaw ichem mo, ni hawi bei? An ram vênghim nih isan, mî ruan ahang. Ram dangin an inbuai dêk chun an nun chôn khopa itangin an sin ãin. Gideon achu a ram san dingin sipai tam tawk rêk Harod tuidunga midianhei doi dingin an loi inruanga. Malâi chun a sipaihei chu, “Ma indoina a itihe chu kîr roi,” a tia, tamka an kîr hnung homin sîngka an la om. Gideon a hnianga Pathianin nin la tam luat nai ti thû a hrila. Mî riza inthumka chak sipai ithlang inla, tiin Pathianin a hrila. Pathian thû awiin riza inthumka a thlanga, sipai dang kapai chu ân kîr tir rîta. A la om riza inthumka hmanga idoi dingin a ruata.

Midianhei an rot thû: An hmelma Midianhei, Amalekhei nih an sak tianga mî danghei chu Moreh thlâng achun an inkula. An tam lam chu an hang tin sêng no. An saka sabengtung ngot hom an tam zia an hril thei no.

Gideon a sipaihei chu riza inthumka chai an chang homin Lalpa rihmingin an inning. Gideon achun sipaihei an dîna tongtorawt khatka, bêl rong a sunga meiser an isia a pêka. A ãhena pawl inthumkan a siama. An râlhei omna hmun chu zâna an inkhilin an om kual a, ãong a cha rît a, “An inkhilin ei om hnungin keiin tongtorawt hang mût ki tia, kachun bêl sunga meiser isapa, LALPA nih Gideon a khandai, tia awng ding,” tiin a cha rîta. Mangkachun Gideon an tongtorawt a hang tuma, an awng dur dura, an bêla meiser chu an hang tâ ta a.

Midianhei ân thlawm thû: Mangkachun zâna voikarenga Gideon a pawl sipaihei rihâi hawiin Midianhei chu an thoia, an ãiin zân lâi achun râl inson tonin anmani nih anmani reng an intuk

thama, an rota. Gideon a nih a sipaihei nih an kawla Israel hnam hrang hrang chun an hong ruan ve a, an that chiama, an lal Oreb nih Zeeb chu an that sa. Lalpa thûpêka ikal, ife, idoihei chun tuifinriat angka râl lian hom an inhnê ðin. Gideon a nih a pawl sipai riza inthumka lekin mî a sîngtêl sipai, Lalpa hratnain an inhnê. Chunkachun mîhei chun Lalpa ringa sinthaw hi hnaena, a thupêk zawm hi hlawtlingna nih ðiomna hmun homa ði loina a loi chang. Eini hom itiklâi pain a pawl angkan hroi hom eila Lalpa thû ei zawm chun eimani hmangin sinthawtheina nei ei ti, ti hawi mai a ðul.

Zawna:

1. Midianhei doi dingin Gideon a nih a sipaihei izaka mo an fê?
2. Gideon a nih a sipaiheiin Midianhei an bei lain imo an tia, an awng?
3. Israelheiin lal inhnika an hong ihman ha tuhei mo an rihming?
4. Gideon an inkan mo sipai a zem ha?

Zirlâi 19

Mî hrat Samson

Siar ding: Roirelpu 13:1ff.

Thuvong: “Pathian chu ei bîkna nih ei hrâtna achanga, Lung riang lâia ðangpui thappu hnâi chem achang.” (Sâm 126:3)

Thuhmahruai: Tunlâi T.V. a mî hratheï hmêl nih taksahi ei hmû. Anmanihei hi taksa insawizoi mî nih nêkfâk ða, inhâi thei thil fâlloi an chang. Vawn Bible ami khatka taksa ða, hrattê chanchin zir ei ti.

Vantirkoi inlârna: Ei hong izir tâk ahan Gideon a ha a hnam chipuihei hnam dang tidudana aþangin Lalpa zara a san ðin ha. Israel hnam nunchang hi lunglian, a dika hmangsawtloi mî an chang. Pathianin a hnam pum reng a san ðin ti an hawitheina dingin a hrem ðin. Hremna hi insiamþhatna ding achang ðin. Nu nih pa homin anni hrem hi ei ðatna ding tiang thiltum achang. Israel hnam hom Pathianin kum 40ka Filistia mîhei thuhnuai a sia. Malâi hin Zorah khua mî khatka nâi neiloi a om a. A pasal chu Manoah. Ma nu hnianga voika chu vantirkoi a zun lâra, “Nâi von ni tia, nâipa nei nê ti ... nâipate chu sînga a om nî aþangin a thî nî ariin Pathian dingin, Nazarit chang a ti (Nazarit chu serhrang tina achang). Ma nâipate chu a hong lian tikin Israelhei chu Filistia mîhei kut aþangin san a ti,” a ti pêka. A pasal hnianga ma thû hi a hril lâi takin vantirkoi chun an hnianga a hong nawka, “Ni nâipa nei ding hi ða vaikan nin enkol ding, uain achangnawlemo zû hrât chî in loi ding, thil inthiangloi ihman fâ loi ding,” tiin a hong hril nawka. Vantirkoi ti angkan nâipa a neia, a rihming Samson an saka. Vantirkoi hril angkan an enkol ðat êm êma inthiangloi rêng rêng an inthawtir no a.

Samson an Filistia mîhei a ngam thû: Samson achu a hong liana, a hmêl hom a ðata, a hrât êm êma. Voika chu Timnah khua nunghak bawma a fê a, lampuia kei rêk an intonga, an insuala, a kut zenin a that an ti. A nunghak pan ðin hin a hawi no kârin pasal a loi nei khala, a ning a thik êm êm achang. Voika chu sihal riza inthumka hi a hmana, an rimei hmul inbûrluk hi ân zoma. Filistia mîhei thlâichi nih olive hmun achun a zu thlung kual, a hâla, a meichokin an thlâichi nih olive theihei chu a kâng siata. Filistia mîhei ning a thika, an inngaitua a. Samson a ningthik sinthaw achang ti an hawi suaka. A nunghakin a hawi no kâra pasal a loi inei khal an hawi chun,

Filistia mîhei chun ma nunghak pasal neia chu a pa rêk an hmana, an hâl that. Ma chu Samson an a loi hawi nawk chun, Samson a ning a thik vê nawka. Filistia mîhei chung a ruai a ÷uana, a that vê thama. A kala Elam lungpui kâra a van nghama. Israelhei chun lungpui kâra om chu an va pana. Filistia mîhei kuta intulut dingin an va tia. Asanchu Filistia mîhei a that leia an ning thikin Israelhei an intak tir tham. Ama leia an ituar ti an ihril chu a hawi thiam, ân pe ta a. Israelhei chun hruiin an khita, Filistia mîhei kuta an van hlâna. An loi lawmin an awng dur dura. Malâi tak chun Pathian Rithla a hong inlâra. Voikarengin a hrui chu a sata, sabengtung riki rû a lâka, Filistia mîhei chu a thuka mî sangka ding zet an thî an ti. Lalpa Pathian ineipu, iringpu chu tiklâipaiin hmualinphoi a phal no, ti mahin ei hmû.

Zawna:

1. Nazarit tina hi imo?
2. IHmangin mo Samson an Filistia mîhei a thuk thama an thî ha?
3. Filistia mîhei hi tuhei hmelma mo an chang?

Zirlâi 20

Mî hrat a tlawm thû

Siar ding: Roirelpu 16:1-31.

Thuvong: Samson achun, “Filistia mîhei rêk loi thî rong,” a tia. (Roireltu 16:30)

Thuhmahruai: Ei la hawi mo, Samson an sabengtung rikha ru in mî izaka mo a that? Mî sangka. A thû awi nih zawmpu chu Pathianin a ruan dingin ân ning mai mai ÷hin. Changrochu ama inhnîl apai chu ani homin ân hnîl ÷hin.

Samson a nih Delilah: Samson an Sorek khua a nunghak hmêlthâ a dita, a rihming chu Delilah. A va bawm ÷hina. Malâihin Filistia mîheiin Samson a hman an tum vêl lâi achang. A nunghaknu Delilah hnianga tangkarua ipe a, a thlangvâlpa inhmantir dingin an faw a. Poisa indi in Delilah chun a loi awi a. Pathian thû chun, “Sum ngainat hi sual tinrêng bul,” a ti angka tak takin Delilah chu poisa tamka leia a dit telema, an hman dân ding remchâng a zonga.

Samson a an hman: Poisa tamka a lâk hnung chun Samson a inhmantir aw remchâng ngot ngot a zonga. Voika chu hruihruâl thar sawmkan ni phiar unla, a tia, an phiara. Achangale a sat pêk rîta. Delilah chun a fia a fia ÷hina. Voika chu bei vaikan a êlpui chung a ân zâl tira, a chiarpui ta a, ân don vela. Machun a nunghaknu hnianga Nazarit achang thû a hrila. Chun a piangtîr aţanga a sam hom lân cheploi thû a hrila. Mangkata a êlpui chung a ân zâl tir, a tuai vela, a chiarpuia. A hang inn lâi chun a sam a loi chep pêka. Mazoile Delilah chun Filistiahei an hong tiin a awnga. Samson achu a hang hara, a hang pung le, a hratna om ta loi, mangkachun an hmana, tang Ina an khum. Mahin ei hawi ding chu Lalpa aţanga ei malsawm dong hi hril rît ding achang no.

Samson a ennom Ina: Samson-a an ihman chu mipui tupai hmû thei dingin ennom dingin an hmang ta a, Filistia mîhei pathian Dagon Ina inthawi thei nghâl dingin tiin filistia milian nih mipui tupai an omkhawm lain an hong ÷huia. Malâihin a mit hom an ikhersuak pêk tâk, ihman hmûthei ta loi achang. An hong ÷huia, an loi nuia, an elêia. Malâitakchun a lungrilin a Pathian ân hnîl naw a. Lalpa hnianga a awnga, a ÷onginţaia, “Aw LALPA, ki Lalpa, ni hawimai ro. Atûn ÷uma ding chakin hrâtna ni pe ro,” tiin. Lalpa’n a ÷onginţaina a thunga, hratna a pê ti ân hawi

chun an omna lung In chaw lian, an tlungnahei chu a khiaka, In lian chu a chim a, mî tamka a del that ta a. Samson a hom chu a thî vê ta achang. Malâia In idel that mîhei an tam zia chu a hratnain mî a loi ithat kapai hnek homin an thî tam zawk, an ti. Lalpa ringpuhei chu tiklâipaiin a ensan ngâi no. Loi insual khal thin hom eila, ei lungril ama ei pêk phot chun ane ngaidam awi ti loi hawi rei.

Zawna:

1. Samson a nunghâknu ân hnîna rihming tumo?
2. Samson a hratna bul ha hril ro.
3. Samson a hratna inkan mo a boi?

Zirlâi 21

Moi ringom

Siar ding: Ruth lekhabu.

Thuvong: “Tûmo nupui thafê sersuak thiam om? Asanchu a hlutna chu invawna thehraw chung dai ami achang zawk.” (Thufing 31:10)

Thuhmahruai: Inneina ahin moi lawm ei ti thin. Nupang hi Moinu, Ipa hi Moipa an chang. An innei ariin ipai a tha rît. Innei zoi hun a hong kal zeal nâi nei hnunga moi thaloi tak tak om thei an chang. Vawn moi fel chanchin zir ei ti.

Nêkfâk zonga infen: Tiana Bethlehem khua a insungka hi an oma. An pa rihming chu Elimelek achang, an nu rihming chu Naomi achang. Nâipa inhnika an neia, an rihming chu Mahlon nih Kilion. Voika chu tàm a thlâka, an insungin Moab rama an infena. Machun an nâiheiin nupui an nei vê vê a. An nupuihei chu Orpah nih Ruth an chang. Tawika hnungin an pa Elimelek achu a thî. Chun tum tawika hun sung dena a nâiheii Mahlon nih Kilion chu an thî vê vê a. An nu Naomi chu khongai thlâk êm êm achang. A pasal a thî a, a nâiheii an thî vê vê a, a moihei inhnika rêk chai an om ta a.

Bethlehem tiang an inpêm: Naomi chu ân ngaitua a, mikhual angkan ân hawia. Maleiachun, a khua hlui Bethlehem tiang dena infen dîngin ân ninga. A moihei a iompuihei hom tuhman nâi la nei an om no a. Mangkata an khua hlui kîr nawk dinga ân ning rît hnungin a moihei chu an pahei Ina kîr dîngin a faw a. A moinu Orpah chun a poma, a tarpi chu tap pumin a fawpa, a kalkhal ta a. Ruth rochu a tarpi zui tir dîngin ân ninga. Lalpa'n an chung a om dinga ani ti aw aw a om dinga inningin. Naomi chun an khua hlui Bethlehema a kîr puia. Mahin Lalpa ringin tut u homin ipaia inthuralin an oma, an inthlâr thin no.

Ruth chu pasal a nei thû: Bethlehema an va kîra, intakfêkan an oma. Thlâi ât lâi achang (Barli achang), mî thlâi âtna hnunga an i-ât zoiloi an iþulhei intikin Ruth chu nintin a fê thina. Voika chu a tarpu (a thî tâk) unâipa Boaz a phaia thlâichi intikin a fê a. Boaz achun a loi hmû a, a loi ngainat êm êma. A intik bâka a iâtsai hom a loi inchawi sa a. A tarpi a va hrila. A tarpi homin va fê nawk a phal thina. Boaz a homin Ruth chu a loi hmû nawk thina. A ngaiven chun a tarpi rêk chaia inremfêka an om ti a hawisuaka. A di ta a, nupuiin a nei ta achang. Ruth chu tlawm vaika nunchang tha chu inching tak Boaz achun nupuiin a nei ta. Inzakom fêka thlâi âtna hnunga

zongna hmun chu a neipu a va chang ta. Taimâkna nih nunchangin dinghmun thaa a kâisang thei, ti achang.

Zawna:

1. Elimelek nih a insunghei ha Bethlehem aţang han ihmun mo an pan?
2. Moab ram aţanga Naomi zuitir aha tumo achang?
3. Ruth han tuhei thlâi âtna hnung mo a va intik thin ha?
4. Ruth chun pasal a nei nawk rihming ha hril ro.

Zirlâi 22

Biak Ina naipangte

Siar ding: 1Samuel 3:1-21.

Thuvong: “LALPA ti ro, ni bawiin ân ngaithla.” (1Samuel 3:9)

Thuhmahruai: Koihran tinin Biak In ei nei pak. Biak In chu ei ngaina pak. Biak In a roiinpuina, a thianganhlimna chu a biaka fêhei lei achang zawk. Maleiachun Lalpa biaka fê hi ulian naipang ti ding achang no a, Pathian biaka fêpuhei phot chu lungril taka Pathian tianga lungrila ibiak ding achang.

Hannah chun nâipa a hnî: Nupang khatka Hannah an iti a oma, a pasal rihming chu Elkanah. Hannah hi a pasal a hmangai êm êma, a nâipa angka khopin a lawm. Nâi neilo an changa, maleiachun, nâipa an dit vê êm êma. Hannah hin abikin Biak Ina a kala tap pumin Lalpa hnianga nâi a hnî thin. “Nâipa ani pêk phot chun Lalpa ni kuta inhlân ke ti,” tiin, a tongintai thin. Hannah tongintaina chu Lalpa’n a poma nâipa a pê. A rihming chu Samuel tiin an sak. A nu in a duat êm êm a, rihnu a nghei hmaka dêk chu ten hmana a kalpui thin no.

Sanuel achu Biak Ina: Sanuel achu rihnu a nghei vele a nu in puithiam Eli hnianga a thui. Shiloh Biak Ina, Lalpa hnianga ki hnî angkan nâipa ani pêka, kei homin ki nâipa Samuel a hi a damsung kapai Lalpa sinthaw dingin kên hlân, a hang tia. Hannah hi enton tlâk mî achang. A hnî a, a hmu angkan ân hlân nghâl. Ei ni hom Lalpa hmâa ei ihnî ei dong chun Lalpa hmâa ei inhlân ding ti loi inhnîl naw rei.

Samuel achu a nu in ân hlân angkan puithiam Eli achu a thiam angkan rongbawl a ruan achang. A nu in a hang vêt thina, chunkachun Lalpa rongbawlin a oma, mihriam ding homin demkâiloiiin a om. Eli a nâihe rochu an that naw a, mîheiin Biak Ina an thil inhlânhei an idit di thei an loi lâk pêk thina. Mîheiin an hnawng êm êm achang. Pathian hmâa inthianghei hi mihriam laka ding homa tha a loi chang.

Lalpa Pathianin Samuel a a koi: Samuel achu Lalpa Biak Ina riak thin achang. Zânka chu, “Samuel, Samuel,” tia ikoiin rawl a hawia. A pu Eli a ikoi a sona, a pu hnianga a vâ a. A vân don chun, a pu Eli achun nang ki koi no, a tia. A va zâl nawka, mangkadên chun ikoi rihâi a hawi nawka. A pu dên a vân don nawka, a pu Eli achun a hawi thiam ta a, Lalpa Pathian ikoi ti a ring leia, a pu in nang a koi nawk chun hnikahin thung ro, Lalpa mahin kê om mai ithaw ding mo ni hril ro, kên ngai mai, ti ro, a tia. Kachun a va zâl nawka rihâi a hawi nawk chun, Lalpa kê om mai, ithaw ding mo ni ti ro, tiin a thunga. Lalpa chun, Eli achu a nâiheiin thil thaloi an thaw

homin a hal ðin no, maleiachun hrem kê ti, ti rawl a hawia. A pu hril a ngik fêa. Changrochu, hril le dinga a om leia, a hrila. A pu Eli chun Lalpa rawl ti a loi hawi thiam.

Ei ni hom Lalpa thûa sin ding mo thaw dinghei hi ei pom le ding ahang. Samuel achu a hong liana, a hnianga Lalpa a om ti ân hawia. Lalpa'n zawlnei, a hmang ding ti an ring ðana. Ei ni hom Pathian thû ei awia a hnianga ei ðonginai chun Lalpa'n ni pom a ti, ti loi hawi rei.

Zawna:

1. Pathian hnianga nâi hnipu ha tumo?
2. Samuel a a hong liana tumo a hnianga om maia a hawi?
3. Inkata mo Pathianin puithiam Eli a insung a hrem?

Zirlâi 23

David a hriak bua thû

Siar ding: 1Samuel 16:1-13.

Thuvong: “Mihriam chun pûtianga a lang dân an en ðin, LALPA rochun lungril tiang a en ðin.” (1Samuel 16:7)

Thuhmahruai: Ei hong izir tâk ahan Biak Ina a nu inhlân aha tumo ha? Samuel achu a nu chun naipang ahang ahangin puithiam hnianga Biak Ina a va mâka ringom vaikan a sin. Eini hom Pathian hawia ei thaw dinga omhei hi ringoma ei thaw ding ahang.

Pathianin Samuel a a tir: Israelhei lal hmasak chem chu Saul a ahang. Saul achun Pathian rawn loiin a thû thû in roi a rêl ðin. Maleiachun, Pathian a chung a lung a awi no. A thleng ding sininsiana sahriak ibua dingin Lalpa'n Samuel achu a tir. Mangkachun Lalpa thû zawmin Bethlehem tiang a suak ta a. A suak lâi hin, lal Saul an a kalna san ni hawi a ti ti a ði leiin sehratte a chawia inthawi dinga ikal angkan a suak. Asanchu Saul a lungril chun a thî hmaka inlal a awi a, a thî hnung hmana a nâi inlal tir a awi ahang. Mahi mihriam lungril ahang, ei hneka ðha a iom dingin mî dang dusakna hi ei ei inngai thiam no. Maleiahin ahang mihriam lâia buaina a suakna ðin.

Lungril enpu LALPA: Samuel achu Bethlehem khua a hang tlung chun Bethlehem mîhei an loi ði a. Asanchu zawlnei angka an ingaisâng êm êm chun an khua a hang rak chu a hangna san an hawi nghâl no. Samuel achun a chawi sehratte inhlânna a hang neia, an lawma. Mazoichun Pathianin a thaw ding a hrila. An khua a Jesse a nâihei a khât khâta a hmâa hong tir dingin a tia.

Ahmasa chemin an upa Eliab a hong a. Samuel an, mahi chang bani Lalpa'n sahriak bua ding a ti chu, a tia, sahriak a bua a tuma. Malâitak chun Lalpa'n, “A hmêl nawle a dung insâng tiang en naw ro, ama hi ki pom no. LALPA chun mihriam en dân angkan a en vê ngâi no. Mihriam chun pûtianga a lang dân an en ðin, LALPA rochun lungril tiang a en ðin,” tiin a hrila.

Mangkachun a nâi dang an hong ve a, an la chang no, a tia. Atawp chema an naibung chem bera rakhâla om, rama om chu an va koia. A hmêl hom a ðhata. Samuel a kawla a hong a. Mahi ahang ta hi, a tia. A sahriak chawi chu a lua a bua a. Ma nî ahang chun Lalpa rithla chu a chung a om ta maia.

David achun ân makin. Eini hom ân makin inhawi ei ti mu. Pathian thiltum a fela, a hlawsam ngâi naw a, putriang en loiin Lalpa'n a rongbawl dingin a koi ðin.

Zawna:

1. Samuel aha ten khu a amo a kal ha?
2. Puithiam Samuel an tumo lal dinga hriak a buak aha?
3. David a pa rihming hi imo?

Zirlâi 24**David a hriak bua thû**

Siar ding: 1Samuel 16:15-23.

Thuvong: “LALPA hnianga lawmthû hril, ni rihmîng inpâka hlâ sa hi, Aw, Chunginnung chem, a hei tha êm!” (Sâm 92:1)

Thuhmahruai: David a sahriak buapu ha tumo? Samuel a achang. David a an va koi han ia om mo? Imo a thaw? Bera rakhâlin rakhâlna hmuna om. Ringoma sinthaw hi Lalpa'n ân di. Gideon a hom ringom vaika a sin lâiin koina rawl a hawi. Chun David a hom lal dinga sahriak bua achang hnung homin intakna tamka a tong. Lalpa'n ama dinga a idithe chu thil dang hmangin fiana a pe thin.

Ramhuaiin Saul a an inbuai: Saul a Israel hnam chung a lal, roirêlpu dinga a idit ân thlang achang. Changrochu ân dipu Lalpa thû a awi no. Lalpa hom ân sira, a chung a ramhuaihei sin a phal. A san thei dân zongin tîngtangpuma Lalpa inpâkna hla isak thiam ikoi dingin an rotna Saul an a pom.

Tîngtang suk thiam an koi thû: A siahlawhei rotna ipomin Bethlehema Jesse a nâipa David a tîngtang sukthiam va koi dingin thû a sua a. Lal thupêkin Jesse hnianga a nâipa David achu lalin a koi ti an va hrila. Ani hom chun ihman hnial loiin uain bûr nih kêlte chawiin a tira. Lal Saul an a loi hmû chun a lawm achang. Bera rakhâla iom thin ha atun chun lal Ina a om.

David a lal Saul a hnianga a om: Saul achun David achu a ring êm êma. A ralthuam enkâipuin a siama. Ramhuaiin a hong inbuai feng David achun tîngtang sukin, hla rêka a awi chun ramhuaiheiin an kalkhal thin. David aha Samuel an sahriak a bua aţang han rithla inthianga sip achang. A sinthaw paia a hlawthling zêl thin. Lal Saul a ramhuai ichen chil Lalpa inpâka tîngtang a hang inrem chun lal Saul a hom a hong har thin.

Einite David a nun nei thiam ve ai ei ti mo? Lal Isua chun, Ane ringhei chun keima thilmak thaw hneca roiinpui hom thaw thiam an ti,” a tia. Lal Isua ei ringa ama a ei innghat tak tak phot chun thaw ve thei ei ti.

Zawna:

1. Naipang tîngtang sukthiam êm êm aha tumo achang?
2. Lal Saul aha imo ân buai thin ha?
3. David aha Saul an a koi lâi han a pa in imo a inchawi?
4. David achu tîngtang rêka Lalpa inpâka a hang omin lal Saul achu inkan a om thin?
5. David aha ahmâ han isin mo a thaw?
6. David a sinthaw nawk hate imo?

Zirlâi 25

David achun milian-mihrat a ngam

Siar ding: 1Samuel 17:1-54.

Thuvong: “Indoina chu LALPA ta achang.” (1Samuel 17:47)

Thuhmahruai: Israelhei kumkhuaa an râlhei chu Filistiahei an chang. Maleiachun, itiklâihmanin anmani leia lunghnipna an nei no. Bulbâl nei theiloi khopa, loi In hma nei theiloi khopa indoi ðhin an chang. Tualbawm inremloi hman a bei no ti roi. Hnam inremloi dêk chu ðiom a ti.

Goliath achun Israel hnam ân zuam: Voika chu Israel nih Filistia indoi dingin akhiang khiang an inthoka. Filistiahei lâia an hoitupa lianka, hratfêka a oma. A rihming chu Goliath an ti. A dung insâng tawk ngot hom tong rukka achang. Miin an ði êm êma. Ama chun Israel sipai tiang a hei awng khum ðhina. Mimal mala anen zuam an om le hong suak roi, tiin. Chun mimala nê ngam nin om le Filistia sipai kapai ni hnuaiia lân pe rît ro ung, tiin a hong awng ðhina. Israel sipai chun a veng, a ðongna a va en takhman a ngam an boi ðhin an ti.

David achu sipaihei lâia a va: Israel sipaihei omna achun a uhei an om ve a. Asanchu malâia indoi hi insunga tlangvâl pate aria indoina ikal rît rît an chang ðhin. A uhei nêkfâk thaka a va ðhin an ti. A va lâi mat hin Goliath achu a loi awng vêl lâi a va hmû a. David achu, turai mo, tiin ân don chun, a uhei homin a hril an ngam no, an ti. David achun ma indoina hmuna kal kê awi a ti ðhina. Ma thû chu lal Saul a an va hrila. Lal chun David achu a koia. Naipang chai ni la chang, a ti pêka. Changhomsiala, David achun a awi naw leia, lal Saul achun, achangnawle ki indoi thuam inthuam ro a tia. An hang inthuam tir le a chel no. David achun lal Saul a hnianga, ki pa in bera hra dingin ani tira ki ichawi ðhin, ki vir vawm ân tawk. Lalpa ’n ani san ðhina bera râlhei hom Lalpa ring sanin kê ngam ðhin. Mangkadenin Filistia mîhei hom Lalpa ’n ni pe a ti, a tia. A kal ve a.

Milian/Mihrat chu a tlawm: Indoina tlânga David achu Goliath achun a hei hmû chun a nuikhuma, a zakpuia, a ngainepa. A hei awnga, e khai hong ro ni taksa va in an fâk a ding a loi hei tia. David achun, Goliath tiang, nangchu thuamthil rêka nê om, kei chu sipaihei LALPA Israelhei Pathian rihminga kê hong, thuam dang ihman ki nei no, a tia. A lung chawi chu a vir vawma a hang bela, a hang sepa, Goliath a chal taka a hang fûka. Goliath achu ân lîr ta a. sipai danghei chu an rota. David achu a hang renga Goliath a khandai denin a ring a ât a. chungkachun Filistiahei chu ân tlawm ta achang. David a vir vawmte a Filistia sipaihei a ngam, an ngam aw hi ân mak achang.

Eini hom a tak taka Pathiana ei inngat chun ei hmêlmahei ngam ve ei ti.

Zawna:

1. Filistia sipai hoitupa hrat êm êm ha tumo a rihming?
2. Goliath achu itenka mo ân sang?
3. David achun ithuamthil hmangin mo Goliath a ngam?
4. An mîchang hril ro: Goliath, David, Saul, Filistia.
5. Naipang David ahan inkan mo Filistiahei a ngam ha?

Zirlâi 26

David achu chawimawiin a om

Siar ding: 1Samuel 18:1-30.

Thuvong: “Changrochu, Israel nih Judah mî kapaiin David achu an ngainat êm êma, ani chu an lâia lûtin a suak ðhin lein.” (1Samuel 17:47)

Thuhmahruai: David an Filistia sipai a that aha tumo nin la hawi mo? Goliath. Lalpa Pathian ringin a vir vawm hmanga a ithat achang. Apostol Paul an anên hrât tirpu leia ipai kê thaw thei a tia. Pathiana innghat ha chu Lalpa’n a thaw pêk rît thei.

David a chungsa Saul a a lawm: Filistia sipaihei an va ngamna san chu David a leia ti Saul an a loi hawia, a lawm achang. A pa hnianga ikîr hom a phal ta no. A nâipa Jonathan a rêk an inrem êm êma, an inþhian ta achang. Lal Saul an a ring ve êm êma, sipai hoitua a siam. Sin a ipêk apai fel takan a sin pêka, David achu kâisângin a om tir achang.

Saul a itsikna thû: David a rihming chu hmun tina ân thanga. Mitinin an inpâka. Mipuiheiin an lawmna hla chun, “Saul achun a sâng sângin a thata, David achun a sâng sângin,” an tia, an awnga. Ma rihâihei chu Saul an a loi hawi chun a ngaithei naw a. A itsika, a that a tum ta hiala. Ma hi mihriam nunchang hrim hrim, keima nên pâk sia ti hi mihriam nun achang.

David a nupui nei: Lal Saul an nainu inhnika a neia. A loi itârlang chu, Filistiahei hoitupa Goliath a that thei apai ki nainu innei tir ding ti hi. David achun a vir vawmin a thata, mîheiin an hong inpâk ta. A nainu hom chu ân neitir hom an son a. David a hom lal mâkpa chang ding rihâi hawiin a loi lawm ve a. Changrochu, lal Saul an a nainu Merab chu mîdang ân nei tir vit a. Khatka la om Mikal chun David achu a loi dit ve a. Innei tir dingin remruatna an hang siam chun, lal Saul an a iti chu, ki nâi hman aia Filistia mîhei aþanga an servun riza inhnika a u pêka. A u na san tak chu, David a hi mî servun lâka fê sia a thî nâk mo a tina achang. David achun Lalpa Khongaina zâra olsam takan Filistia mîhei servun a va lâk thiama. Lal Saul a an hang pêka, a nâinu Mikal chu David a ân nei tir ta a.

David a ipai sin hlawtlinga a omna san hi atira Israel lal dinga hriak ibua a loi chang lei nih Pathian ân hnil naw lei achang. Kachun Israel nih Judah hnam pumin an ngaina ta hlek hlek achang. Pathian ðipu chu Lalpa Pathianin a thlâ ngâi no.

Zawna:

1. David a champa rihming imo?
2. Merab hi tumo achang?
3. David a nupui rihming imo?
4. Lal Saul a nâinu inhnika rihming inzia ro.

Zirlâi 27

Phuba la naw ro

Siar ding: 1Samuel 24:1-22.

Thuvong: “Maleiachun, mîin nin chung a thaw siala nin iawi chu, mî chung homa thaw ve roi.”
(Matt 7:12)

Thuhmahruai: David a thianpa Jonathan a. An inthian dâna an thupui chu, nangma nê hmangai angka inhmangai ding. Jonathan a pa chu lal Saul a. Lal Saul an David a ha ân thîka. Asanchu lal hnekin David a inpâkna mipuiheii an hril tam leiin. Dinghmun inzukna hi itsîkna achang. Pathian awiloi achang. David achu Pathian thû awia, ipai thaw thîn, Lalpa'n maleiachun a thaw apaia a thawpui a, a hlawtling thîn achang.

David a rotboi thû: David achu lal Saul an a hnel êm êma. A sinthaw that hom a lawm tâk naw leia, remchanga that mai dingin ân ning a. Machu David achun a hawia, a rota. Adullam pûka a lûta, a bîka. Ma hmun achun a paheii nêkfâk an zu thak thîna, chun mîdangheii an zui ve a, an om ve tiama. Mî 400 ding zet an om ta a. Lal Saul a chung a lung awiloihei phot David an pana, an hong tama. An hmun chu him dingin an ring naw a., Zif tlâng thlalera an infena.

Saul an David a a zong thû: Voika chu lal Saul a sipaiheii Filistia mîhei an uma. Malâichun Engadi thlalera David achu a om ti an hong hawia. Lal Saul a an hrila. Lal Saul achun sipai 3000 a thûia, an va zonga, an hmû no. Lal Saul an mangkakhopin David achu a hnelin a zong achang.

David achun Saul a nunna a zua thû: Hun sawtka a zonga. An fê hmuna Saul achu a hnawng, inzun dingin berarual lûtkhawmna thîn khura a lût a. David a nih a mîhei loi inngam ve na tak achang. Mî an om hom son loa ilût achang. David achun daivalkan a korfual hmor a ât a, a her a lâka Saul an a hawi no. Awi siala chun malâihin David achun Saul achu a that thei. Ileia mo a that loi? Asanchu David an a hawi chu lal Saul a hi hriak buak achang. Einite mangkata remchangin ei râlhei hmû ei la, ei ngaidam pei ding ai mo!

David a intiamna: Hnunga David achun Saul a hnianga a puan a itan chu ân hmû a. Enta nangma angka chang inlang nang kê that thei. Ki omna khura ni hong lâiin ani hmû no. Keite nang ki hmû a, ni puan her ki ât, a tia. Ma nî hin David a hnianga Saul an, ki hnengin nê fel nê tha, ki hawi ta. Lala ni hong om tikin ki chipuihei nunna ni zua pêk hrâm ro tiin nê tiam pêk hrâm ro, a tia. Lal Saul a ti angkan David a hom ân tiam. David a hi khovêl mîtin enton tlâk. A râl lian Saul a a ti puma a oma, that remchang hom that loa, Lalpa'n ki chung a ngaidân thaloi, a thaw thînloi phuba Lalpa kuta tia Lalpa a inngat achang. A nunchang hi mihriam zir ding tha chem achang.

Zawna:

1. David achu lal Saula tiin ten mo a rôt ha?
2. Pûk sunga han David achun imo Saul a chung a ithaw ha?
3. David a nih Jonathan a incham thupui ha imo?
4. Lal Saul a han David a zong dingin sipai izaka mo a thui?

Zirlâi 28

David a lal achang

Siar ding: 2Samuel 5:1-25.

Thuvong: “Ki mê Israel hrêpu chang ni tia, Israel chung a vongpu chang nê ti.” (2Samuel 5:2)

Thuhmahruai: David achu a that itum râl laka inthup inthupin ramhnuai nih thlalara a om ðina. A omna paia mîpuin an zui ðina. Saul a a râl lian khatka achang homin lungril ðhaloi ân pu ngâi no. Isuan, “Ni chabek chang tiang inbenpu hniang achun hlangka tiang hom daw pêk ro,” a ti angka maiin.

David achu lalin ân ðung: Saul achu Filistia mîhei rêk an indoi lâiin a thî a. An lal a thî a, Israelhei chu lungril hmunka inpuin Hebrona an kalkhawma. Ma hmun achun an lal dingin sahriak an bua a. Israel lal dingin David a an hnamhnet (Ordained). Ma hun hin David ahi kum 30 mê chai a la chang. Ma Hebrona hin kum 7 nih thlâ 6 lalin a oma. Jerusalema kum 33 ân lal nawka. Tiana zawlnei Samuel an a loi ihrillawk aha atakin a tung ta achang. Ma hun tung ding hin intakna tamka a chung a tunga, tuarthei fêkan Pathian remruat chu a nghâka. Mangkachun David achu Israelhei lâia kum 40 an lalin ân ðung.

Jerusalem a lâk thû: David achun tiana an pi an pu hun lâia an ingam ðin loi Jebus mîhei omna Jerusalem chu ila dingin ân ninga. Ma ding chun sipaihei rêk an inthoka. Jebus mîheiin an hawia, an pi an pu hun lâia angka dena la ngam nawk dingin an inringa. Asanchu kul ðatak nih thum ða an nei leia an êlêi vêla. Mitchaw nih pheibâihein la loi khap mai mai rise, an tia. David achu ðavaikan a sipaihei rêk an inninga. Jebus mîhei chu an ngama, an khua rihming hom an thlenga, David a khopui, tiin an sak thara. Ipai a siam ðat rîr hnungin ma Jerusalem chu an lua a. Machun nâi ðatak tak hom a la nei bel an ti.

Filistia mîhei David achun a ngam nawk: David achu Israelhei lala ân ðung ti an hawi vele, a doi dingin Filistia mîhei an hong a. Refaim hmuna kul an siama. Machu David achun a hawi le an inning ve ðana. Changrochu ma indoina a ama ngêi a kal ding bei ti Lalpa ân dona. Lalpa'n a phalin a hawia, an vân doi ta a. Filistia mîhei chu an rot dâra, tamka an that ta a. Ma ngamna sin hi Lalpa indona sin a thaw ðin lei achang. Mangkachun Israel lâia Lalpa'n a hnamhnet, a roiinpu tul tul ta a. Tura lal Hiram a dêk chun a ram thing nih a mîhei lâia mestori ðahei an In bawl pui dingin an hei infe ðin achang. Mahin zir ding om chu David ahi lal ding a chung a sahriak bua achang homin intaknain a lawi naw a. Lalpa rihmingin ipai a hong tuara, Lalpa hun ruat a nghâk pei achang. Eini ringtuhei homin Lalpa remtina hi ðonginâia indona ei nghâka ei kal ding a loi chang ti hi.

Zawna:

1. David a hi Hebrona kum izaka mo ân lal?
2. David a inlal hun zung zong zong izaka mo?
3. Jerusalem a han ihnam mo a loi omhei ha?
4. Ten hmuna mo David a lala an inthunga an hnamhnet?
5. David a hnianga tumo In bawlpu ding a mîhei hong tir a ha?

Zirlâi 29

David achun Pathian ân pâk

Siar ding: 2Samuel 6:1-23.

Thuvong: “Aw ki nunna, LALPA chu inpâk inla, ki sũaga om kapaiin a rihming thianghlim chu inpâk ro.” (Sâm 103:1)

Thuhmahruai: David achu lalin a thũaga iamo ân fenna ha? Jerusalem. Jerusalem ha David a khopui ti homin an koi sa ha. Mahin David David achun Pathian ân pâkna thũa, ileia mo Pathian ân pâk? Ipaia thil nê thawpêk thìn chũaga mĩ tupaiin ei inpâk thìn ti roi.

Thuthlung Bawm an lâk thũa: A hmũa ei hong izir tâk ahan ei la hawi kê ring. Mosi a hnianga Pathian Thu Sawm pêk a pêk ha. A thunna dũagin a bũa thatak an siama. A sunga an sia, thũavaikan an vong ei ti ha. Ma hun lâi hin ma bawm chu Baale khua a Abinadab Ina a oma. Ma tak ami chu va la dũagin David achun mĩ tamka a ruata. A chawina dũagin tolailir an siama. Ma chu Uzzah nih Ahio heiin an khala. David a nih Israel insunghei chun inrithei thil rêk an kal hmasak a, an hlim achang. Hmun hneta an om tâk achang leia Thuthlung Bawm an hnianga isia an awi a.

Vanduaina an tong: Mangkata an hong kal leiin ân sok luat leia Nakon hmun an hong tung chun Uzzah chun Pathian bawm chu hman dũagin a hei bana. Lalpa'n machu a awi no. Uzzah chu a thũa ta nghâl achang. Asanchu Bawm chu tawn reng reng loi dũa a loi chang. Uzzah chun thilthũa thũa a inngai ve chang awm tak. David a homin a ti ve ta a. An kalpui ngam tâk naw a. Git mĩ Obededom a Ina an mũaka. Pathian chu thũkthũasia achang, maleiachun a thupêk zawm mai a thũa a loi chang. Thawloi dũa a iti Pathian thũa a ei ihmũa chu thawloi a thũa achang.

Jerusalem an hong tung thũa: Thuthlung Bawm an mũaka Obededom nih a insunghei chun Lalpa malsawmna an dong pha a. chungkachun David achun a va la le dũagin ân ngaitũa nawka. Obededom In aũaga an va lâk chun, kê rukka an kal zoi feng Pathian hnianga an inthawia, tongtorawt an muta hmawloiin an chawia, a siana dũa hmun thar David a isiam achun an sia a.

David a lâm thũa: Jerusalem pana an hong kalpui lâiin David achu linen efod inthũamin a theitawpin a lâma. Eini hom Lalpa hmũa lungri la lawmna a om hin zũikhawm, inkhawma ei lâm thìn mu. Mangka lâm puma an hong kal lâi chun a nupui Mikal chun tukvera omin a loi zuk ena. A zakpui fê a, a pasal David achu a hrila. Achanghomin David achun mangkata Lalpa ngêiin Israelhei lala ani ruata, anê ruatpu Lalpa hmũa inkata ki lâm loi dũa. Ma hnengin la lâm dũa, la lawm dũa achang, a tia. Mikal chun Lalpa hmũa a pasal lâm chu a soisêl leia a thũa hmaka nũaisalin a om. Eini hom Lalpa malsawmna ei dongin Lalpa inpâk ei zak loio dũa achang.

Zawna:

1. Ten khũa aũagin mo David ahan Thuthlung Bawm an va lâk ha?
2. Thuthlung Bawm inthũa ithũa ha tumo a rihming?
3. Pathian Thuthlung Bawm ha tu Ina om mo?
4. Tumo David a lâm soisêl ha?
5. David achu tu hmũa lâmin mo ân hril ha?

Zirlâi 30

David achun thutiam a hlen

Siar ding: 2Samuel 9:1-13.

Thuvong: “Mî châi pe thînpu chu tiklâihmanin insam naw nia, Changrochu, a mit loi insîng thînpu chu vânisalna tamka dong a ti.” (Thufing 28:27)

Thuhmahruai: David achu atira Samuel an a lûa sahriak a loi bua tâk angkan Israelhei lala a thung ta ngêia. Dik vaikan a mîhei roirêlin a hmêlmahei hom Lalpa tangpuinain a hnê tir a.

David an a thutiam a hawisuak: Lal Saul a nâipa rêka an inthianna inthûk tak achang ti ei la hawi mo? David aha Saul an a that tumin a zong homin a champa Jonathan an a loi thup thîin ei ti ha. An intiam dânin nakana an thlahei ari homa inhnîl loa inthangpui dingin thutiam an isiam a loi chang. A pa Saul a indoia fê ding inthok a hmû a, a zui ve a. Filistia sipaiheiin an indoina hmuna an pafa in an loi thata. David achun a hawiin poi a tia, a champa Jonathan a nâi-insung a vân zong tir a. Ziba an iti Saul a bawi thîin hi a oma. David a hmâa an hong thûia. David achun ân dona. Ani chun Jonathan a nâipa a la dam thû a hrila. Changrochu a pheisia a tia. Asanchu a pahei indoina a an tlawma a pahei an thî ti an hawi kanin a donpuin a rotpui lâiin a ba puia, a phei kiak. Malâichun Jonathan a nâipa chu kum 5 mî chai a la chang. A piangtira nâi tha, piangsual tlailuat a boi ti angka mai achang ta chu.

Lal David a hmâa Jonathan a nâipa Mefibosheth: David achu a champa nâipa Mefibosheth achu a la dam thû Ziba chun a hrila. A hang thûia. A pa champa lal David achu chibai a bûka, David achun tha vaika enkol dingin thû a pêka. Jerusalem kawla om dingin a tia. Chun a pu Saul a hun lâia an ram nih an thil kapai a kuta inhlân dingin thû a pêka. Ma a inhlân kapai enkâi thapui dingin a hong thûipu Ziba hom a chaa. Mangkachun Jonathan a nâipa hom a hong unlian hnung homin hun tha a la hmang ve achang. David a hmangaina, khongaina iom hi mahin ân lang. Mî tamkan ei thei thîin no. Eini hom ei chamthahei an thî, an dam, an nâihei hun ariin mangkachun chang ve ei ti mo?

Zawna:

1. Jonathan a nâipa rihming ha tumo achang?
2. Mefibosheth ha tuhei hnianga om ve a nêkfâ dingin David achun a ti?
3. An mîchang hril ro: Jonathan, Mefibosheth, Ziba.

Zirlâi 31

Lal sipai ringom

Siar ding: 2Samuel 23:13-17.

Thuvong: “Thî hmâka ringomin om ro, kachun, nunna lallukhum chu nang pe kê ti.” (Thupuang 2:10)

Thuhmahruai: Sipaihei lâia a hun taka huaisen taka loi sinhei chu lawmhman pê an chang thîin. Sipai sinthaw hrim hrim chu a ram isan, mîhei ruan, mîhei dinga mâni nunna inhlân ngam ding, maleiachun thâiindawroi ding achang.

David a tui hrâl lâi: Voika chu David a hei nih Filistiahei an indoia. Thlâi ât lâi achang. An indoina hmun chu Judai ram thlaler achange. David achu an inkulna hmuna an innghama. An ngaitua a, tiana Bethlehem kulkot bula tuikuang tui dai in a hang awi êm êma. Asanchu ei sawl lâiin ei tuihrâl a nat ðhin leiin a loi chang.

Sipai huaisenhei: Lal David a tui hrâl lâia a tui in awi bîk Bethlehem kulkot bula tuikuang tui kher a hang in awi thû hawiin sipai lâia mî Josheb Basshebeth, Eleazar nih Sammath chu an inthoka, Bethlehema tui chawi dingin. Achange, ma tuikuang chu an râlhei i op hmunpui achang nghâla. An pu in a in awi ngoi ngoi achang leia thî ði loiin an râl Filistia sipaihei kâra tui chu an hang chawi pêka. David achu a lawm êm êma, an pu thû awia an nunna chôn khopa an hang inpêk chu. Ma angka ringomna hi ram nih hnam inding suakna achang ðhin.

David achun a in awi no: David achu a lawm êm êm, changrochu a hang in ning tak taka, ân ngaitua chun, a tui hrâl lâia a in awi chem Bethlehem tui, a sipaiheiin thî huama an hang ilâk pêk chu a in naw a. Lalpa zâr chaia an hang ilâk thiam a tia. An tui chu Pathian rihmingin ân hlâna, a bungsuak an ti. Ma angka sipai huaisen a nei leia ngamna (hnena) achang. Sipai ringom chang dingin ei inpuacha ding chang a ti.

Zawna:

1. David achu indoi lâiin tui a hrâl, tena tui mo a in a awi?
2. A tui in awi ichawi dingin sipai izaka mo an fê suak?
3. A tui in awi tak an hong tlungpui hnungin, ma tui chu imo David an a thaw?
4. David achu tui a hrâl lâia tui hang chawi pêkhei rihming hril ro?

Zirlâi 32

Hrî inlêng thû

Siar ding: 2Samuel 24:1-25.

Thuvong: “LALPA kuta loi ðul zawk rei, asanchu a zângainahei chu a roiinpui leiin.” (2Samuel 24:14)

Thuhmahruai: Hmun hrang hranga hrî hrang hrang ân lêng ðhin. Ma ding hin sorkar homin a ngai poimawa vaccine mo injection hom atlongin an pê ðhin. Hrî a lêngna achun mihriam an tuar ðhin.

David a inchapoi thû: David achu Jerusalema lala a ðhung tâka. A indoipuihei an ngam ðhina. A ram ân zat tir a. A lungril a chapoia, ân uang ta a, a rama mî om zât ihawi a awi a, intintirna a siana.

Intinpuima thû: Ram pumpuia mihriam intin hi thil innep achang no. Sêng a tama, hun hom ân di sawt. Ma sinthaw dingin David achun a sipai hoitu Joab nih sipai tamtawk a tira. An sin zoina dingin thlâ 9 nih nî 20 an hmang an ti.

Pathian thû hong tung: Ma intinna David a isiam ahi Pathianin a awi no, ân hua achang. Maleiachun, Lalpa'n David a hnianga zawlnei Gad a hmangin a rama hremna hrî inthumka tung ding a van hril tir a.

- a. Kum 7ka tãm tuarna,
- b. Hmêlma tĩa thlâ 3ka roboi,
- c. Nî 3ka hrîpui inlêng.

A thil thawsual leia Lalpa'n hremna ân tlung a tumna san chu Lalpa rawn loia a sinthaw lei achang. Lalpa rawl zawlnei hmanga a hawi hnung chun siam t̄at thei hom achang t̄ak naw a. Maleiachun, David achu Lalpa hmâa a t̄ongint̄aia thupha a chawi, "Aw Lalpa ni siahlaw dikloina hi inthlaw fêka ki thawsual ni ngaidam ro," a tia. Pathian thuthlung chu p̄her thei changloi achang leia a ram achun hrî a hong tlung ta a. Mî tamka an thî pha ta a. Vantirkoiin hrî dang chawia a hong lâiin Pathianin a khapa, chang d̄êk naw siala chun la thî tam an ti.

David a thilpêk inhlân thû: Hrî inlêng chu a nansat fê a, mî an thî thama. David achun vantirkoihei hnianga chun a mîhei chung a hrî chu ngaidam hrâma iomin, keimani bîk chung a ma hrî hi om rise ti a hnî a. Chun Lalpa rihminga hâlral inthawina siam dingin Araunah khua achun a hanga. Lal chu a loi hmû chun chibai a bûka, a hongna san ân dona. David achun ram puma hrî a t̄anga him theina dingin Lalpa hmâa inhlân dinga hong achang ti a hrila. Kachun, Araunah chun lal David a hnianga, a t̄ul apai k̄el nih adang a t̄ul apai hmanga inthaw dingin a phal thû a hrila. David a rochun a awi naw a. Ama s̄enga inhlânna a siam ding achang a tia. Chungkachun, hâlral inthawina a siama, Lalpa Pathian chu a lawma, hrî a t̄angin a san ta a. Mahin ei zir ding poimaw êm êm chu, ei inthialna, ei insualna inhawia Lalpa hmâa ngaidam inhnî hi Lalpa ringtuhei thaw dinga Pathian idit achang.

Zawna:

1. Joab a nih a sipaihei r̄ek han intinna sin ha nî izakan mo an zoi?
2. Tu khua a mo David achun inthawina a siam?
3. David a inthawina siamna san imo?
4. Hremna thil inthumka ha hril ro.

Zirlâi 33

Lal v̄ar Solomon

Siar ding: 1Lalhei 3:3-28.

Thuvong: "LALPA t̄i chu v̄arna bul achang. Thianginhlima hawina chu hawitheina hi achang." (Thufing 9:10)

Thuhmahruai: Ei lâia tumo a v̄ar chem ding aw! Mî t̄henkan inchong, hoitu, thuneipu apai mî v̄ar an ti t̄hin. Inchong, hoitu phot mî v̄ar an chang bîk no. changrochu inzirna nei vai loia v̄arna nei hrim chu an om thei. Mî v̄ar ei hawina chu mîhei t̄ul lâia an t̄ulna ihawipuihei hi an chang phot. Mangka manganna huna hin mî v̄arhei remruatna hi fel tak nih t̄angkâi tak achang t̄hin.

Solomon an v̄arna a hnî thû: David a thî hnungin a nâipa Solomon a lala a hong t̄hunga. Solomon achu Lalpa a inngat mî achang. A pa la sin zoiloiei a sin zoma. Voika chu Gibeon a khua a inthawina a siam lâiin Lalpa rawlin, ni hnî ro, imo nang p̄e inlang ni awi, ti a hawia. Eini chang eila imo ei hnî ding ai? Solomon achun, Lalpa ki pa David a ni loi khongai t̄hina, maleiachun, a thî hnung homin kei a nâipa lala ani sia nawka. Mangka zoi zâi mî nih sa ani p̄ek hi ki enkol theina dingin v̄arna ni p̄e ro. A sia a t̄ha ki thliar hranga roi ki r̄el fel theina dingin, a

tia. Chun Lalpa chu a lawm êm êma, inchongna, hmêlma a ngam theina ding hom nê hnê loa, roirêl fel theina dinga vârna ani ihnê zawk chu. Mangka ngaidân tha nei ki la hmû no, ani ihnê loi inchongna nih roiinpuina nang pê sa ke ti, a tia. Pathian chu Solomon a chung a lawm êm êm leia a hnê bâk hom a pê ta achang. Einite ei ihnê ani pê no ei ti thin. Ei dinga tha achang naw chang bâni.

Solomon a vârna ân thang thû: Solomon a vârna chu hmun tina ân thang ta chiama. Tumka chu nu inhnika nê inchu a hnianga an hong a. An nê nei ân ruala, hmunka om an chang nghâla. Khatka nê chu a suak ve le a thê thaia, a thêpu nu chun arukin a nê dampu nêite chu a hawi naw karin a loi thlenga. An inkhala, mîheii an hawi pui thiam no. Solomon a vâ inthang hnianga an hanga. Lal Solomon achu an hrila. Ân ngaitua fê a, hnunga chun nêite la dam aha intia bakka intan dingin thû a pêka. Lal thupêkin ala dam nêite chu an hong tan ning tak tak chun a nu changloi zawk chun a poiti naw a. A nu tak chun a nê inriang hmûin a khapa. Ân khingpui nu ipê dingin a phala. Ma vela Solomon achun a hawi thei ta a. Thê phalloipu ha a nu tak achang ha, nêite ha ama pe roi, a tia. Mahin Solomon an a hawi theina chu a nê neipu chun a nê tak a hmangai leia thê a phal no achang. Ma roirêl dân dik chu mitinin an hawia, Solomon achu an inpâka.

Zawna:

1. Solomon an Lalpa Pathian hnianga imo a hnê ha?
2. Nu tak hawina dinga nêite chung a Solomon an imo thaw dinga a iti ha?
3. Nu inhnika nê inchu ha inkan mo a rêl dik pêk ha?
4. A tupu han mo nêite dama nu?

Zirlâi 34

Solomon a tempul

Siar ding: 1Lalhei 5:1-6,8.

Thuvong: “Lawmthu hril pumin a kothei achun lût unla, a kottual lâi zawl achun inpâk pumin. A hnianga lawmthu hril unla, a rihming chu inpâk roi.” (Sâm 100:4)

Thuhmahruai: Solomon a lal vâ chem achange, ama angka lal roiinpu an la om ngâi no. Ama hun lâiin Israel hnam pumin an zalena. A kawla om tupaiin ram hman an pêk thin. Ama diingin nih a nupui rihming homin In tamka an bawla. Rangkachak lunglhu hom tamka a nei.

Tempul bawl dinga ân puang thû: Solomon achu Lalpa'n a pa David a lal thungna ilua dinga a ti angkan lal a hong change. A pa hnianga Lalpa'n Tempul bawl dinga a hril tâk angkan ân ning țana. A hnai ram Tura lal Hiram a hnianga Lebanon tlâng thing lâk phalna a hnê a. Lal Hiram achun a hnê angkan a phal pêka. Chun a siahlawhei lâia mestori tha tak tak a tlanga, a hang tir a. Ma ding chun Hiram a dingin Solomon an a mîhei fâk dingin gom nih sahriak a hang pêk ve a. Chun Solomon a mîhei, Hiram a mîhei nih Gebal mîhei chu Tempul thing dingin an rama taima fêkan Lalpa Tempul hmangrua sin achun an inhmag hoia.

Tempul bawl: Solomon a inlal kum 4na kum achun Tempul chu an bawl țana. Tempul dung chu tong 60ka, a khang tong 20ka, ân sâng dân tong 30ka, taima vaikan an sin hoia. An sin hoi lâi hin hriamhrei rihâi ihman a om no. Asanchu, ahmâ ațanga ipai riruat sai thil achang leia. Thil

ruahman lawkna hi ipai olsamna achang. Tempul chu lunga an ibawl achang homin a sung chu sidar thing hmang achang. A lung reng a lang no. Chun a ʔuanghei chu fâr thingphêk rîta inbel achang. Achung chu rangkachaka inchûl achanga, a kothei chu olive nih fâr thinga siam. Cherub, tum thing nih pâr rimil an khoka, rangkachaka an ichûl nâm achang.

Tempul bawl zoi thû: Solomon an Jerusalem Tempul kum 7kan a bawl zoia. Poisa, rangkachak nih tangka nih thil hlû tamka a sêng. Tempul chu a roiinpuia, a en ân hoi achang. A hun lâi chun Israelheiin an inuangpui êm êma. A pa David a hun Pathian thû a nâipain ân hlawtling tir ta nghâl achang. Eini hom Biak In ei bawl. Ringtu chun Biak In ei nei pak. Biak In chu a ʔha a om thei. Mataka a biakpuhei nun ʔha sia Lalpa'n machu a idit zawk achang.

Zawna:

1. Solomon an Tempul a bawl han ân lalna kum izakana mo?
2. Solomon a Tempul bawl ha a dung, a khang, ân sâng tawk izaka mo?
3. Tempul bawl kum izakan a zoi?
4. Solomon a loi ʔangpui lal ha tumo?
5. A dik le-a dik, a dik naw le-a dik no tiin thung ro:
 - a. Solomon a ân lal kum inthumkanain Tempul a bawl. _____
 - b. Solomon achun a pa David a ʔhuthmun a lua no. _____
 - c. Solomon a hun lâi ha chun ram hman an pê no. _____
 - d. Tempul dung ha tong 60 nih a khang tong 20 achang. _____
 - e. Solomon an Jerusalem Tempul kum 10kan a bawl zoi. _____

Zirlâi 35

Tlangvâl huaisenhei thû

Siar ding: Daniel 3:1-30.

Thuvong: “Kin Pathian, a rong kin ibawl achun meipui chok aʔangin ane sansuak thei.” (Daniel 3:1-30)

Thuhmahruai: Kristianhei chun milêm ei biak ngâi naw a. Vawn hom tlangvâl 3ka milêm biak awiloi Judah tlangvâl chanchin zir ei ti.

Babulon lal roiinpu: Tiana Babulon ram lal a om a. A roiinpuia thilthaw thei tak achang. A rihming chu Nebukadnezar an ti. Ram dang a doi apai a ngama, Judah lal Jehoiakim, Jerusalem lal rêk an indoi lâi homin ama dên a hrât. Mangkata ama chu a ngam boi angka a om leia mîhei homin an huphûr êm êm an ti.

Saltâng tlangvâl thû: Nebukadnezar achun Jerusalem a hnê kumin Israel nâi lâia mîʔha tlangvâl rual demdingboi, hmêl ʔha êm êm nih vâr tak Babulona a ʔhũa. An lâia Daniel, Hananiah, Mishael nih Azariah an oma. An rihming a thleng puia, Daniel achu Belteshazzar, Hananiah chu Shadrak, Mishael achu Meshak, Azariah chu Abednego, tiin a saka. Anmanihei hin lal an inlawm tir êm êma, maleiachun an chamheiin an inthîk achang.

Lal Nebukadnezar achun milêm a siam thû: Lal Nebukadnezar achu a hong chapoi dap dapa, a roiinpuina inlang tir dingin milêm lianpui ân siam tir a. Ân sâng lam tong 60ka, a lian dân chu

tong rukka. Rangkachaka siam achang. Dura phâia an sia a, an inngîr. An biak țanna dingin ân hong hun an siama. An milianhei dêk chu om le ding a tia. Ma hmun achun tupai milêm liampui rihminga kokkhupa chibai bûk ding ti thupêk a siama. Chibai bûkloi phot chu meipuaia pai ding ti achang.

Milêm chibai bûk ve awiloi: Milêm chibai bûk dingin tongtorawt an hong tuma. Lal thupêk awiin tupai bokkhupin chibai an bûka. Judah tlangvâl 3ka, Shadrak, Meshak nih Abednego chun chibai an bûk ve awi naw a. Lal hnianga an chibai bûk awiloi thû an va hrila. Poi a loi ti fê a. voika chibai bûkna hun an siam nawk ding thû an hawia. Anni chun chibai bûk loa meipuaia pai hom an thlanga.

Meipui: Cham inthumka lal milêm chibai bûk tum reng reng loi ding thû a loi hawia. A ning a thika. Meipui a lêt 7ka inpuia isêm dingin thû a pêka. Cham inthumkahei chu an phiara, meipui achun an paia. Lalin a hei en chun mei lâia mî inlika a hei hmû a. An hei koia, meipui ațangin an hong suaka, an pang mei rim hom a nam naw an ti.

An iring Pathianin anmani san ding naw hom sia an ti tâk angkan thî hom an tlanga. Changrochu Pathianin ma nî hin a san ta zawk achang.

Ma nî ațang chun lal Nebukadnezar a lungril a danginlam ta a. chamrengkahei Pathian ring inthûk zia a hawia, mipui tupai hawiin an Pathian ring rihming tuhmanin hrilseloi dingin thû a sua a. A hrilsia apai that ding tiin.

Zawna:

1. Nebukadnezar an ihmangin mo a milêm lian a siam?
2. Tuhei mo milêm chibai bûk awiloihei ha?
3. Milêm ha itawka insâng nih ilian mo achang?

Appendix-I

Palm Sunday

Siar ding: Mark 11:1-11.

Thuvong: “Hosanna! LALPA rihmînga hongpu chu a vannei.” (Mark 11:9)

Thuhmahruai: Zînga mo chohnung tiang mo, raisok hna chawiin hlâ sa pumin khua ei infang ðin. Machu Lal Isua chawimawia a om nî hawimaina hun ei ihmang ðin.

Isua chu tumo chang: Isua chu tumo chang? Pathian nâipa. Mihriam chatuan hrem hmuna om ding nê san dinga khovêla hong kal. Pathian nâipa hman changsia khovêla inngaitlawm fêka hong kala, bawi angka mîhei rongbawl ðin. A thuneinain tuhman a tilui ngâi naw a, mî inrianghei hnianga hun a hmang ðin. Mîheiin an hawi naw a, an loi inhua achang.

A thiltum: A hongna san chu Pathian intlung nih khovêl sandam. Mîhei hnianga a hongna san a hrila. Nun danglam, nun thar innei a tum. Damloihei ân dama, pheï inbâi nih damloi dang dang ân dama, a kalna paia Pathian ram thu a hrila. Inhmangai inton ding nih thlamuangna intlung. Maleiachun sakhua mî intihei chun an hawi thei naw a, a siatna an zong zawk achang.

Chawimawia a om thû: An hawi naw leia Isua chu soisêlna dong pumin rong a bawl ðina. Nîka chu a danginlam ta a. Jerusalema Kût hun hmang dingin a kal ve a. A zirtirheiin tuhman la chuang ngâiloï sabengtung tuaite an hong kaia. A chung a an puan an tha a, a chung achun Isua a chuanga. Malâiin mipui an awnga, “Hosanna! LALPA rihmînga hongpu chu a vannei, Lalpa rihmînga ei Pa David a lalnaram hong hi a vannei. Chunginsâng chema khin Hosanna,” tiin. A kalna ding lampuihei achun mî ðhenkan, a sir, a hmâ, a hnunga an zuia, indoia fêhei ngama an hong a an loi don angkan. Ma nî hin Kût hmang nî achanga mîhei an tam achang.

Eini hom ma nî poimaw ahin Isua ei Lalpa, Sandampu achu ei theitawk insua a, ei thei angka ei chawimawi ve nî ding achang. Asanchu chawimawi tlâk Pathian achang leiin.

Zawna:

1. Isua hong kalna san imo?
2. Isua ichunga mo a chuang ha?
3. I khua mo roiinpui vaikan a lût?

Appendix-II

Easter Sunday

Siar ding: Matt 28:1-10.

Thuvong: “Mahin a om ta no. A hril angka tak han a thoinawk ta.” (Matt 28:6)

Thuhmahruai: Easter Sunday hi nî poimaw hawi mai ðul achang. Isua a thî a, a thawinawkna nî, ringtuhei inngatna hun poimaw achang. Hmun tamka tia mî ðhenka chun ma hawimaina lawm entirnain aritui but an inpê kual ðin an ti.

Isua thî thû: Isua chu Jerusalema roiinpui vaika a lût thû ei hong zira. A soisêltu pawl chun Isua roiinpuina hlâ, Hosanna a tihri hnianga iom ve in a siatna an zong vu vu a. Mangka hun lâiin a zirtirhei lâia mî khatka chu poisa ipe a inhmantir dingin an loi faw a. A rihming chu Judah

Iskariot. Arukin poisa tam tawk a lâk zoiin a hman dinghei rêk Getsimani rihuana Isua chu a ÷ongin÷ai lâiin a van hman tira. Khêl nih sual thawpu tiin puithiam nih lekha zia KPUheii an hêka. Krosa an khêngbeta. Lal Isuan khovêl sandam dinga hong kal an ti ÷hina. Mîheii nunna an hmûna dinga a nunna ân hlân ding thû a hril ÷hina. Mahei kapaia chu nang nih keima ding homa a ithaw achang. Krosa a thî hnung chun a zirtirheii a ruak an hong lâka, thlân rong a zu phûma. A thlân chu lungpum liankan an hruka. Machu zirtawpnî achang. A thâi achun Judahhei chawlñî (Eini ding chun atuna ei inringnî) ahangna. A thlân chu a vêng dingin ipai an sia a. Asanchu a ruak chu zirtirheii an hong rûk duaiin an tia.

Thlân korong: Sabbath nî (Inringnî) an hmang zoiin, Pathiannî chun Mari Magdalini nih Mari dang chu thlân en dingin rim÷ha chawiin an va a. Ma tûk hin lî ân hning chiama. Rivan a÷angin vantirkoi a hong a. A puan silhei chu angoi vâfêka, a hmâi a hmêl en ngamloi khop-kolphe ni el angka mai. Isua thlân sîna lungpum chu ân hluma. Vantirkoi chun ma nupang inhnika hnianga chu, “÷i naw roi, mahin a om ta no, a thoi ta, hi en roi a zâlna ihman a boi,” a tia. Isuan a damlâia a ÷ongbâi, “Keima hi thoinawkna nih damna chu kê chang,” a ti angkan thîna ngamin a thoi ta. Ma a thoinawkna hi ahang Pathian nâi ahangna a langna chu. Eini a ringpuheii ei chawimawi ding ahang.

Zawna:

1. Isua inhmantir dinga ipom aha tumo?
2. Tuhei mo thlâna va hmasakhei ha?

Appendix-III

Pentikos Sunday

Siar ding: Tirkoihei Sinthaw 2:1-13.

Thuvong: “Thutak Rithla a hong tik chun thutak kapaia nangni ÷hui a ti.” (Johan 16:13)

Thuhmahruai: Pentikos ti hi Grik ÷ong ahangna, ei ÷ong chun nî sawm ringa tina ahang. Ma nî hi tiana kalhlen Kût an nei a÷anga nî sawm ringana chia ahang. Eini dinga a hlutna chu ma nî chia hin Rithla Inthiang ÷lung nî ahang.

Rithla Inthiang Intiam: Isua a thî hmâin a zirtirhei hnianga a intiam chu, nin hnianga ki om naw homin nangni a thlamuang dingin Rithla Inthiang nangni hong tir pêk kê ti, a tia. Ma Rithla chun an hawiloï hom hrilfia ÷hin a tia, Pathian ÷luk chang ati.

A zirtirheii an nghâk: Thîna ingama a thoinawk hnung han a zirtirhei hnianga voi tamka ân lâra. An hnianga a ihril ÷hin chu, Rithla Inthiang an dong hmaka Jerusalem kalkhalloï dingin ân cha ahang. Isuan a cha angkan beisei fê pumin, beidongloïin Jerusalem pindan achun ÷ongin÷ai pumin an nghâka. An hoitupa omloi, an lungriangna rêk, anmani reng mo hman ding an hong ti ding hom hawiloïin an ÷ongin÷ai ÷hina. Maleiachun a zirtirhei chu an ringna an inlang tirna ÷ha chem ahang zawk.

Rithla Inthiang a ÷lung thû: Mangka beisei fêka nghâk hram hramin hlawtlingna a loi chang ei hawitheina chu, pindan sunga an om lâiin Rithla Inthiang an hnianga a hong ÷lung ta ngêia. An

omna chu a hong sipa, an rengkan Rithla Inthiang chun an sipa. Rithla chun òng hrang hrangin an hong òngsuak ta a.

Mîheiin an hawithei no: Pentikos nî a Rithla Inthiang an dong nî hi Judahhei Kût poimaw hmanglâi achang. Mî tanka an omkhawm lâi achang. Mangkata a ringtu, a zirtirheiin Rithla Inthiang an dong leia an rîk mur mur chu mîheiin an ena. A hmûhei chun an òng chu mâni òng angka òngin an hawia. Mak an ti achang. An om dân an hmû chun zu inhâi an chang an tia, achange an thûhrilhei chu an òng òngin an hawi nghâl.

Rithla Inthiangsinthaw hi ringloi mî ding chun ringhlel om hrim achang òin. Thenka ding dêk chun nuizat om achang. Achangei ding chun lunghnip tak nghâl. Vawn ariin eini hniang homa a ringpu, a beiseipuhei hnianga òlung thei achang. Ei lawmna, ei rengkan Rithla Inthiang idonga lunghnip dingin loi ònginòai òin rei.

Zawna:

1. Isuan a zirtirhei imo pe dinga a intiam ha?
2. Rithla Inthiang ha i nî han mo a hong òlung pêk ha?
3. Pentikos ti hi itina mo?

Appendix-IV
Missionary Sunday
(John Bunyan a chanchin)

Siar ding: Timothei 4:1-8.

Thuvong: “Mî vârhei chu boiruak vârtak angkan inêng an ti. Mî tamka felna a inhruaipuhei chu chatuan chatuanin arsi angkan inêng an ti. (Daniel 12:3)

Thuhmahruai: Kristian Vanram kawng Zaw lekhabu hi nin hawi ta òin bei? Vawn chun lekhabu òha nih inngai bei tak, Kristian Vanram Kawng Zaw inziapu John Bunyan a chanchin zir ei ti.

John Bunyan a hi kum 1628 han sâp ram khua khatka Bedford an itia hin a pianga. Insung châi tak an chang. A pa hin mî bêl òhaloi siam vêl mai hin nêkfâk a loi inzong vê òin. John Bunyan achu a hong ònginvâla, a khua nunghâk Mary chu nupuia a nei ta a. Changrochu, John Bunyan a hin Pathian a hawi naw leia an insung hom a hlim vê thei no.

John Bunyan a piangthar: John Bunyan achun Pathian nîhei hin inkhawm fê hnêk chun paitep indâi hi a thlang zawk òina. Voika chu indâina a a om lâi hin rawl rihâi angka hin, “Ni sualna insima vanram kal mo ni awi, achange nawlemo ni sualna rêka hremhmuna kal?” ti angka hin a hawia. Matak aòang chun John Bunyan achun ân ngaitua òan ta a. Bible a siar vêla, a nun a danginlam tir a tum vê a. Changhomsiala, a nun a danginlam chuang naw a, thlamuangna a nei chuang no.

Nîka chu nupang inthumka hin thû an loi hril lâi hi a va hmû a. An hlim zia nih an thlamuang zia a hmûin piangthar vê a awi ta êm êm a. A lung a sawla, a inn kêr homin rimang òhaloi tak tak hi a hmû òina. Hnung achun Lal Isua sandamna chu achange vê thei ta a. A hlim ta êm êm a. An insung hom a hlim ta achange.

Baptist Koihrana ân pê: John Bunyan achu Anglican koihrana om thin hi achanga. A hong piangthar hnung aţang chun Bible siar ân peia, thú hril mî tak a hong chang ta a. Changhomsiala, Anglican koihran chun a Pathian thú hril chu an ngai poimaw vak naw a. A rongbawlnaa an dâl zawka. A kalphung hom chu thin a hawi naw a. Ani homin tongintaina thuziak an isam rual thin hang insam chu a tui vê vak naw a. Malâi vêl hin koihran pawl khatka Baptist an loi om vê hrima. Anni chu an hlimin koihran hom chu a damin a hmû tlata. Maleiachun, Baptist koihran achun ân pê lût ta achang. Kachun, a Pathian thú a hril thin hom chu a sunzom nawk ta a, zalen fêkan a om ta achang.

John Bunyan a hman a tong: Vânduai thlâk takan sâp ram lal chun Anglican koihran chailoi chu koihran dang a ngainat naw a. Pawl danghei chu a tiduda a. John Bunyan a hom chu an hman ta achang. “Pathian thú hril ta naw inla suak nê ti,” an ti pêka. Changhomsiala, ani chun, “Vawn hin nê sua unla Pathian thú rochu la hril tir kê ti,” a ti tlata. Kum sawtfêka tâng Ina chun ân tâng hman achang chu. Tâng In aţanga a hong suak chun Bedford khu a Baptist koihran chu a enkol ta a. Kum inthumka hnungin an hman nawka, tâng In dêna an khum nawk.

Lekhabu roiinpui tak ân zia ta: Tâng Ina a tâng nawk sung chun a nupui Mary chu a loi thî a. An nâiheî invai chikatehei enkol dingin Mary chamnu Elizabeth chu nupuia a nei nawka. Elizabeth chun a nâiheî chu a duat êm êm a. Mangkata tâng In dêna a tâng nawk chun John Bunyan achun lekhabu roiinpui tak nih siar bei tak “Kristian Vanram Kawng Zaw” ti hi ân zia ta a. Ma lekhabu hi khovêla lekhabu lâr chem nih zuar tam chem a hong chang nghâl achang.

John Bunyan achu kum 60 mî a hong changin tângna (Pneumonia) a voi a. Tâng Ina a tâng lei nih a châi luat leia hrâtloina hrang hrangin a hong hman ta a. Harsatna kêr nih lunginriangna kêr homa hnet vaika nih ringom vaika a rong a bawl thin a Pathian hnianga chun ân ngham ta a, ani chu a thî ta achang. Changhomsiala, a lekhabu ziak hmangin thú a la hril tir. John Bunyan a angka rongbawlpu tha chang vê dingin Pathian hnianga inpe vê roi, Lalpa'n nangni ruan a ti.

Zawna:

1. John Bunyan a hi ikhua nih irama mî mo achang?
2. John Bunyan a hin ileia mo Baptist koihrana ân fen?
3. Ileia mo John Bunyan a ha an hman?
4. John Bunyan a lekhabu ziak rihmîng ha imo?